



Wantok



Namba 1878 Wan Wik Ogas 12 - 18, 2010

Niuspepa Bilong Yumi Ol PNG Stret! K1 tasol



Beware of false prophets
promising a brighter
future for PNG - P6

Neks wik: 28 pes 40 yia
Anivesari bilong Wantok
Niuspepa saplimen!!

Inglis savemak i go daun tru: Tisa

...Ol Morobe tisa no laikim Autkam Bes Edukesen (OBE) sistem

Bustin Anzu i raitim

OL tisa long Morobe Provins i laik bai ol i rausim gen autkam bes edukesen o OBE (outcome base education) long wanem, savemak bilong tok inglis i wok long go daun long ol skul insait long provins.

O li tok dispela nupela we bilong lainim inglis long ol skul i no wok gut

tumas, na ol i laik bai o li rausim na bihainim olupela sistem bilong skulim ol pikinini.

Sistem bilong ol long pastaim, em ol tisa yet i save kisim ol sumatin long olgeta samting bilong lainim na dispela i save helpim ol sumatin gut.

Ol i lainim ol sumatin long spel-ing, vokebuleri, grama na raiting.

Tasol wantaim dispela nupela

program, ol sumatin i wokim samting long laik bilong ol na ol tes pepa bilong ol em bilong raitim na tok tok tasol.

OBE em i olsem ol tisa bai was tasol na lukim ol pikinini sumatin yet i lainim ol samting.

Ol bai no inap holim sok, dasta na blekbot olsem pastaim ol i save mekim.

OBE em i gutpela long ol kantri

we i develop pinis olsem Australia, Nu Silan na ol narapela kantri, we ol i gat laibri, komputa, intanet na ol narapela samting bilong lainim na i no gutpela long kain kantri olsem Papua Niugini we planti bilong ol skul i stap long ol bus ples i sot yet long saplai bilong skul na gavman sabsidi i no go yet.

I moa long pes 2



Wantok Niuspepa em mipela ya!

TRU tumas, yu noken ting Gavana bilong Nesenel Kapitel Distrik, Powes Parkop i wanpela loya o politisen tasol. Pastaim long em i bin holim ol dispela wok, Mista Parkop i bin wanpela niusman bilong Wantok Niuspepa. Olsem na taim Wantok Niuspepa i makim namba 40 krismas long em i stap long PNG las wik Fonde, Mista Parkop i bin kam raun na givim liklik toktok long ol wokmanmeri bilong Wantok. Em i sanap kisim poto wantaim Jada Wilson, raitman husat em i katunis bilong Wantok Niuspepa, na man husat i save droim Tambu Toro, Bia Bia na pani man yet Kanage! **Poto: Nicky Bernard.**

-Sapos yu sekim na painim Spesol Saplimen i lukluk bek long 40 Krismas bilong Wantok Niuspepa, noken wari tumas. Yu ken sekim insait long Wantok Niuspepa neks wik.

Kisim
Motorola
WX181!



Baim Niupela
Moto WX181.
I kam wantaim
FM redio na
planti moa!

Olgeta fon igat fri
kredit na frim sim kad
stap insait pinis..

Digicel

Bikapa, Strongtalk moa Niteck bilong PNG.

Digicel Tems na Kondisen i stap.



Stap nau
long stua
klostu
long yu

NUPELA YELO

FIN TUNA

wantaim lombo
na soya bin wel



TRAIM
WANPELA
TUDE!

Namba wan kaikai bilong PNG ...

Lusim mani hariap: Papagraun

Bustin Anzu i raitim

WANPELA papagraun bilong dispela bikpela LNG Pro-jek long Sauten Hailans i laikim Nesenel Gavman i mas givim mani long ol papagraun olsem em i bin tok em bai mekim.

Planti bilong ol dispela papagraun i wok long slip kirap long Pot Mosbi na tingting olsem ol bai kisim dispela mani na ol i no save olsem wanem ol famili bilong ol long ples i stap.

Papagraun bilong PDL 1 long Hides Ges Fil, Michael Pai, i tok gavman i bin tok promis long ol papa graun olsem ol bai givim ol Bisnis Dvelopmen Gren na Mem-orendum ov Agrimen Fan, na ol i no givim yet.

Pai i askim wanem taim bai ol i givim taim ol bikpela kontrakta bilong ovasis i go het na mekim wok i go pinis.

“Wanem taim bai ol i givim ol dispela fan ol i tok ol bai givim. Mipela bai kisim mani na mekim wanem long wanem, ol bikpela kontrakta i go het na mekim wok na mipela bai kisim dispela mani long bihain taim long mekim wanem?” em i bin askim long dispela wik.

Em i tok bikpela tingting bilong ol papagraun em long mekim sampela spin ov wok long ples wantaim ol bikpela kontrakta taim ol i kisim dispela ol mani. Wok i go het na ol i wok long wet long kisim mani long Pot Mosbi i stap.

Pai, husat i patron bilong ol sumatin bilong Sauten Hailans na Hela long ol koles na Yunivesiti long Lae i tok ol papa graun i go stap long Mosbi long kisim ol driman mani bilong ol na ol meri na pikinini bilong ol long ples i kisim taim na painim sik tu.

“Ol papagraun i tingting long kisim mani long Pot Mosbi na ol meri pikinini bilong ol i kisim taim long ples na stap. Sampela i dai, sampela i stap long haus sik long kisim marasin na ol pikinini i no go long skul.

“Ol i wetim papa bilong ol bai kisim sampela mani na kam na helpim ol,” em i tok.

Em i tok gavman mas stretim ol dispela fans na ol papa graun mas i go bek na mekim wok bilong ol wantaim ol bikpela kontrakta wantaim LNG projek.

Em i tok gavman i wok long dilaim na kampani wok i go het yet na ol papa graun kisim mani na ol bai mekim wanen.

Pai, husait i kam long Egele ples na makim JV Karai na stap long Lae i tok tu olsem long sait bilong wok, ol i sainim tok promis o agrimen olsem ol bai skelim gut wokman na meri long wok.

Namba wan prairiti i go long ol papagraun na bihain Sauten Hailans na bihain ol narapela provins, tasol dispela tu i no kamap.

Gavman i mas tingting gut na stretim ol papagraun hariap na ol mas go long ples bilong ol na wok insait long LNG projek.



PROMOSEN:

Isi tumas...Ol wok meri

bilong BSP benk husat i save slip long

Gerehu i kam aut long wiken long mekim kepen bilong nu-

pela sms benking sevis we BSP i kamapim bilong ol kastoma bilong ol. Poto i soim ol i

sanap redi long tok klia long ol manmeri long dispela nupela sevis. Poto: Nicky Bernard

Zumim bris em ples matmat

Bustin Anzu i raitim

ZUMIM Bris long Makam Veli em i kamap olsem wanpela trep bilong ol kar i save i ron i go kam long en.

Long olgeta wik, i gat kar i save kapsait long dispela bris na manmeri i wok long kisim bagarap.

Planti taim, ol asples yet i save helpim ol long kisim ol dispela lain husat i kisim bagarap i go kam long haus sik. Dispela em wanpela bikpela hevi we ol pipel long Zumim i gat.

I save gat 2 o 3-pela kar i save kamapim birua na ol pasindia i save bagarap long dispela bris long

wanem, bris i no gutpela tumas long taim bilong ren.

Memba bilong Makam, Tony In-guan, i tok taim bilong ren kolta antap long bris i save wel na i no gutpela tumas long ol kar taim ol i laik kisim brek.

“I gat wanpela amp tu long bris stret. Taim kar i go antap long dispela amp na pundaun antap long kolta wel, em i ken mekim draiva i paul na bamim sait bilong bris o nogat, go daun long baret long sait,” em i bin tok long las wik.

Em i kamapim dispela toktok bilong bris long Palamen long las yia long Minista husat i go pas long

Woks tasol i kam inap nau, i nogat wanpela samting i kamap na manmeri i dai yet.

“Las yia, namba bilong manmeri husat i dai em 54. Nau em go antap pinis long 100. Minista bilong Woks mas mekim sampela samting long dispela na stretim gen,” em i tok.

Dispela bris em wanpela kampani bilong Ingran (England), Mabey na Johnson i bin wokim, aninit long Yumi Yet Bris program long 2001.

Dispela kampani i bin wokim planti bris insait long ol rurel eria bilong Papua Niugini.



Hariap Long Kukim, Gutpela Long Kaikai

Pablik long Mosbi bai lukluk raun antap long tupela Saina woa sip

James Kila i raitim

OL MANMERI long Mosbi siti bai gat gutpela sans long raun antap long tupela woa sip bilong kantri China taim tupela sip ya mekim stop bilong ol long Mosbi long neks wik.

Tupela bikipela sip ya em trening sip "ZHENGHE" (Hal namba 81) na Friget "MIANYANG" (Hal namba 528). Tupela sip ya bai mekim raun bilong tupela i kam long Papua Niugini, Vanuatu, Tonga, Nu Silan na Australia insait long trening misin bilong ol long Saut Pasifik. Deputi Het bilong Misin long Embasi bilong Pipols Ripablik ov China, Zheng Kang i tokaut long ol nius lain long Mosbi long Tunde olsem dispela tupela bikipela nevi sip bilong Pipels Liberesin Ami (PLA) bilong kantri China i

go het pinis long wanpela trening o misin bilong en insait long bikipela solwara long Saut Pasifik. Dispela trening i stat Julai 30 i go Oktoba 20, 2010.

Mista Kang i tok bikipela as tingting o misin bilong dispela fomesin o wok raun em long strongim pasin poroman o frensip namel long China na ol kantri we nevi bilong China bai mekim lukluk raun i go long en long taim bilong trening. Dispela raun tu em long kamapim gutpela poroman pasin namel long nevi bilong China na ol dispela kantri. Long strongim na kamapim gutpela wok eksens nevi bilong China na China ol saveman bilong Nevi i laik promotim gutpela praktikol koperesin o wokbung wantaim namel long ol kantri wantaim ol kadet,

ofisa na ol soldia bilong ol dispela wan wan kantri. i gat bilip olsem gutpela kwaliti na tu strong bilong ol yangpela kadet bilong mipela i ken go strong insait long dispela raun o misin.

Mista Kang i tokaut tu olsem em misin ya i bungim wantaim raun bilong ol lain woa sip na trening long bikipela solwara. Ol yangpela soldia (kadet) bilong 4-pela naval skul long China i stap insait long dispela wokabaut raun long Saut Pasifik Rijen, na dispela bai givim ol gutpela tingting na save long wanem samting ol i lainim na tu wanem samting ol bai lainim i kam long ol lain bilong ovasis kantri ol i raun i go long en.

"Na moa long en tu ol yangpela soldia bilong mipela bai save gut long laip long solwara taim ol i raun long dispela misin," Mista Kang i tok.



TRENING SIP "ZHENGHE" (HAL NAMBA 81): Dispela sip bai kam raun long Mosbi long neks wik na bai yu gat sans long lukim long Mosbi wof.

Medikel bung bai glasim ol laipstail sik

Veronica Hatutasi i raitim

HELT na edukesen em tupela bikipela eria we i save skelim stap na go het bilong kantri.

Sapos helt na edukesen sevis i ron gut na helt makl bilong ol mama na ol pikinini i stap gut, mak long helt stap bilong kantri bai gutpela. Wankain tu long edukesen, sapos pipel i go skul na ol i save long rit

na rait, ol wok developmen bai go gut wantaim moa save manmeri long mekim wok.

PNG Medikel Simposium em i wanpela bikipela konprens i save kamap long kantri olgeta yia. Ol dokta, ol medikel saientis na ol helt woklain long kantri wantaim tu ol sampela dokta na saveman bilong Australia, Nu Silan, Amerika na Innglan i save kisim askim long kam long bung we ol i save sindaun na toktok long ol bikipela wari na hevi long helt sekta na helt laip bilong ol pipel long PNG, wanem samting ol lain olsem ol helt savelain i ken mekim long stretim ol hevi na prisenim ol wok painimaut o risets long ol kain sik long PNG. Ol ripot samting we ol dokta i kamap wantaim long bung i save helpim gavman na moa yet, helt dipatmen long ol wok plen bilong em long helt sait bilong dispela kantri.

Olsem na nau, ol dokta na ol helt lain long PNG i wok long redi long holim namba 46 PNG Medikel Simposium o konprens bai kamap long tupela wik i kam long Wewak, Is Sepik provins. Wanpela wik bung bai stat long Sande Ogas 29 na pinis long Fraide Septemba namba 3.

Planti handret dokta, ol saientis na ol helt woklain bai stap long bung we ol bai glasim ol laipstail sik i wok long kilim dai planti pipel long dispela kantri tude. Dispela em ol sik olsem hat o lewa bilong man i stop na wantaim nogat save, man i dai hariap tasol, sik suga, man i go patpela tumas, kensa na moa.

Het tok bilong dispela konprens em "Ol Laipstail Sik na Kensa".

Ol laipstail sik i wok long bagarapim ol save lain, ol lain long ol setelmen na

ples, ol yangpela manmeri na ol sumatin na ol papamama. Dispela em bikos pipel i wok long dring tumas, kisim planti ol kaikai long stoa i gat planti suga na gris long ol, taim yumi sapos long kisim ol gutpela gaden kaikai bilong yumi. Olsem na planti yangpela pipel long PNG namel long 40-50 krismas i wok long dai long ol laipstail sik.

PNG Medikel Sosaiti i save go pas olgeta yia long kamapim dispela bikipela konprens bilong ol dokta.

Presiden bilong PNG Medikel Sosaiti em Dokta Mathias Sapuri i tok konprens i kisim dispela het tok bikos ol laipstail sik i wok long go antap long dispela taim we moa pipel i dai. Na taim ol dokta na ol helt lain i toktok long dispela, ol lain i save mekim ol polisi bai harim save na putim ol long ol helt plen na tu, apgretim ol haus sik na helt senta bai gat ol marasin, masin na ol ples bilong slipim ol lain taim ol i kisim ol dispela kain sik.

Dokta Sapuri i tok pol laipstail sik i kamap bikos pipel i kaikaim planti ol stoa kaikai ol i wokim long fektori, Na ol planti PNG lain i stap long taun em ol dispela stoa na tin kaikai em i kamap olsem kaikai bilong ol olgeta de. Nara-pela samting tu i kontribut long pipel i kisim ol laipstail sik em smok we planti yangpela pipel i kisim tu, wari na dring bia.

Long wankain taim, neks wik Trinde bai Prais Ministia Se Michael Somare bai lonsim 10 yia Nesenel Helt Plen long Mosbi. Dispela plen bai givim stia long rot we Helt Dipatmen i ron long em stat yet long neks yia 2010 inap long yia 2020.

Ol sumatin i kisim salens long noken bikhet

SALENS i go long ol skul sumatin husat bai ol lida long bihain taim long tok nogat long ol bikhet pasin na i agensim lo i save kamapim ol sosel hevi na AIDS.

Hailans na Momase rijinel gaidens dairekta bilong ol skul, Ben Malari, i givim dispela salens long wanpela bung bilong provinsel AIDS Kaunsel na ol patna i bin kamap long Hagen long las wik.

Long wankain taim tu, Mista Malari i tok ol skul long kantri i mas gat ol

kaunseling na ol kaunsela long helpim stretim ol hevi long sosel sait na HIV/AIDS na givim gutpela stia long ol i ken kamap ol gutpela manmeri long famili, komyniti na kantri.

Mista Malari i tok sapos olgeta skul i gat ol kaunseling lain, dispela bai helpim daunim sampela ol sosel hevi we ol skul i bungim, HIV/AIDS na lain we ol sumatin i ken go lukim na toktok wantaim long kisim tok

stia taim o i bungim wari na hevi.

Em i tok em i raun long planti skul long (Westen Hailans) provins na em i toktok long skul men-esim bihevia polisi we HIV/AIDS em i wanpela samting ol i save toktok long en.

Em i tok planti sumatin na moa yet ol Gret 9 na 12 i stap long level we em i isi tru long kisim binatang bilong HIV/AIDS long wanem, ol i laik painimaut moa long laip

HIGH PERFORMANCE FOOTWEAR

NUBUCK - 11" LACE UP BROWN LEATHER

EXPLORER - 11" LACE UP BROWN KIP LEATHER

BULDOG

benchmark PRODUCT CERTIFICATION

- ✓ DUAL DENSITY POLYURETHANE RUBBER SOLE FOR EXTRA COMFORT AND INCREASED WEAR
- ✓ LIGHTWEIGHT
- ✓ PORON INNER SOLES FOR EXCEPTIONAL COMFORT
- ✓ WIDE STEEL TOE CAPS
- ✓ FULL LENGTH TONGUE
- ✓ CERTIFIED TO AS/NZ 2210.3
- ✓ OIL & HEAT RESISTANT SOLE
- ✓ PADDED COLLARS

BOOT - SLIP ON

BISHOP BROTHERS

everything for industry...

EMAIL: sales@bishopbros.com.pg WEBSITE: www.bishopbros.com.pg

Lukaut long ol 'Fols Profet' i mekim promis long gutpela bihain taim bilong PNG

LONG dispela stori kona bilong yumi las wik, yumi bin pinis wantaim dispela hap tok:

"Bilip bilong mipela i olsem sapos yumi no painim bikpela hevi long kantri, bai yumi mekim rot bilong lukim kamap bilong wanpela dikteta. Na sapos dispela i kamap, yumi mas prea olsem em bai wanpela gutpela dikteta na i no narapela.

Dispela em i histori we i kamap pinis long Afrika na Not na Saut Amerika.

Mipela i gat planti ol kendidet bilong dikteta i stap pinis long politiks bilong yumi husat i wok long tromoi mani go kam na apim nem bilong ol long niuspepa, TV na redio i stap."

Long lukluk bilong mipela, mipela no nap lukim rot i go aut lusim dispela pasin bilong braiberi na korapsen long kantri. Bikos em i go insait pinis long olgeta hap kona bilong PNG komyuniti, na nau em i kamap olsem laipstail bilong yumi. Tru tumas, nau em i wanpela malti milian kina bisnis.

Wantaim dispela kain braiberi na korapsen, em i save daunim tingting na bilip bilong ol pipel, we sapos em i go na i go yet, em bai ol pipel yet i nogat moa strong na maus bilong tokaut. Em nau bai ol pipel i pasim ai na lukluk tasol long painim kaikai bilong wan wan de tasol. Nau mipela i lukim dispela i kamap pinis wantaim Lidasip Koud na Envaironmen Ekt 2000. Rot bilong wok long Palamen tu em gavman i bagarapim pinis na nau i nogat moa fri tok pait long ol bikpela salens i



bungim kantri bilong yumi.

Ol samting i kamap long las palamen sindaun em i soim klia wanem samting bai kamap taim yu larim gavman i pilim olsem strong bilong em i winim strong bilong olgeta arapela lain. Em nau, taim gavman i strong moa yet, strong bilong pipel bai go daun, na bai go olsem inap ol pipel i les long wanem hevi ol i karim.

Isi isi, gavman i wok long pasim pipel long rot ol i ken bihainim long kisim luksave long ol hevi we gavman na ol bikpela bisnis i wok long mekim. Olsem na nau wokbung i stap namel long ol politisen long gavman na ol bikpela bisnis na i nogat moa demokrasi, fridom na rait bilong ol manmeri. Hap tok ol i save tromoi nau em: "Mi gat mendet bilong pipel long mekim samting long laik bilong mi."

Mipela i ting olsem pasin braiberi na korapsen bai stap hia olgeta. Em bai hat long rausim olgeta. Tasol mipela i luksave tu olsem i gat wanpela bikpela birua moa i stap sapos korapsen i strong moa long kantri.

Dispela birua em rausim bilong pasin bilong wankain luksave bihainim ol lo i stap pinis bilong stiaim yumi. Taim yu glasim gut, yu bai luksave

olsem dispela em i astingting bilong lo we i save holim strong palamen demokrasi bilong yumi aninit long wanpela konstitusen ol i raitim na stap.

Yes, i tru olsem ligel sistem bilong yumi i wok i stap, tasol dispela wankain luksave we ligel sistem i mas strongim, i no moa stap olsem na ol wok bilong skelim na bihainim lo na strongim lo i krangi liklik nau. Yes, i tru yumi wok bihainim stret lo ol i raitim, tasol yumi no moa bihainim spirit na astingting bilong lo we i givim ligel sistem dispela luksave olsem as bilip bilong stretpela pasin na tingting.

Olsem taim polis i givim wanpela waren bilong ares long wanpela biknem lida manmeri. Long stretpela rot, kriminal jastis sistem bai bihainim ron bilong em yet na polis bai go het na arestim dispela lida na kisim em i go long ai bilong kot bilong lo bai em i kisim sas. Dispela i save kamap long ol olupela demokrasi olsem Inglan, Australia na Nu Silan. Long dispela kain samting, ol lo kot long ol dispela kantri bai no inap long givim tok orait bilong stopim ol ares waren ol liklik o lowa kot i givim.

Dispela em i no stret, long tupela as: Namba wan, ol bikpela kot i mas luksave long nem na strong bilong ol lowa o liklik kot husat i givim ol waren bilong ares bihain long ol skelim kes bilong polis i kamap long ai bilong majistret. Namba tu, kriminal jastis sistem i mas bihainim ron bilong en, na i noken gat wanpela banis i kam long bikpela kot, inap kes, bihainim

ron bilong en, i go kamap long bikpela kot.

Tasol long dispela kantri, ol bikpela kot bai kalapim lain na stopim polis na ol liklik kot long mekim wok bilong ol.

Kes bilong kisim ristrening oda agensim Ombudsman Komisn em i narapela kes we ol bikpela kot i suvim het na pasim jurisdiksen o wok bilong Ombudsman Komisn.

We i gat lidasip hevi namel long lida na Komisn, nesenel kot i noken kam insait na givim tok orait agensim Komisn o Traibunel long mekim wok bilong ol aninit long konstitusen.

Dispela em mipela i tok long en taim mipela i tok olsem dispela sistem bilong skelim tok na bihainim lo i bagarap pinis long dispela kantri we mipela no inap long strongim lo bihainim stret spirit na asbilip bilong en.

Olsem na sapos lida i gat komplemen agensim Komisn o Lidasip Traibunel, em i gat rait long go long bikpela kot long rausim disisen bilong Komisn, o Traibunel BIHAIN long ol dispela ol institusen o opis i kari-maut wok bilong ol long mekim wok painimaut, na BIHAIN long ol i bungim tingting bilong ol na tokaut long en, na I NO PAS-TAIM.

Ol lo enfosmen ejensi, na ol liklik kot i noken kisim banis long ol i mekim wok bilong ol. Ol bikpela kot tu i mas wetim kes long painim ol bihainim stret ron bilong en, pastaim long ol i givim tingting bilong ol. Long lukluk bilong mipela, ol bikpela kot i wok long wokabout long bris, pastaim long ol yet i lukim ol dispela ol bris. Ol i wok

bagarapim sistem bilong lo na wok bilong strongim lo long dispela kantri.

Long pinisim tok, mipela i tok olsem braiberi na korapsen long dispela kantri bai stap yet. Maski mipela i ken traim long rausim, bai yumi no inap.

Bikpela astingting bilong dispela tingting bilong mipela em bikos ol lain i stap long posisen we ol i ken senisim pasin, em ol yet tu i korap pinis, na bai ol i no inap long mekim samting bilong rausim dispela pasin nogut.

Ol dispela lain husat i mas mekim samting em ol lain i save kisim bikpela hap tru long pasin braiberi na korapsen ol yet na ol i stap insait tru long en.

Em nau yumi kamap long narapela step gen long dispela hevi. Mipela bai inap long askim ol dispela korap manmeri long lukluk long dispela pasin ol i mekim, na mekim stretpela samting. Mipela i ken askim ol long luksave olsem i nogat self rispek bilong husat manmeri i mekim pasin braiberi na korapsen na moa yet, i nogat pablik luksave long ol dispela pipel na ol famili bilong ol. Na taim ol i painim taim bilong dai, olgeta ol samting ol i kisim long pasin braiberi na korapsen bai no inap kisim ol i go long gutpela ples na taim. Na bai ol i no inap kisim olgeta ol dispela samting i go wantaim ol.

Mipela i pinisim dispela wik wantaim wanpela toktok bilong baibel: "Man bai painim gutpela taim olsem wanem, sapos em i kisim olgeta samting long wol, tasol em i lusim sol bilong em?"



**Putim was long
40 Yias Anivesari
bilong Wantok Niuspepa!
Spesol Saplimen
i kam klostu long dispela pepa
bilong yumi ol PNG stret!**



Beware of false prophets promising a brighter future for PNG

IN THIS column last week, our concluding paragraph was:

"Our hunch is that if we do not get into civil unrest of some magnitude in this country, then we are creating conditions for the rise of a dictator. If that happens, then let us pray it would be a benevolent dictator and not otherwise. This is the way history unfolded itself in Africa and the Americas. We already have likely candidates on the political scene busy spending public money and singing out daily praises for themselves in the local media."

It is our view we cannot see a way out of the phenomenon of bribery and corruption in this country, largely because it has permeated the whole spectrum of the PNG society, so that it has now become a way of life in this country. In fact it is now a multi-million kina business.

Coupled with bribery and corruption, it is a further phenomenon whereby the system in place systematically undermines the will of the people so that in time, the people feel powerless, voiceless and that way, the people lost interest in what is happening in and around them, as they concentrate on looking for the next meal to place on the dining table. We have now seen what has happened to the Leadership Code and the Environmental Act 2000. Even the parliamentary process has been corrupted by the government so that there is no longer a free debate on issues of national importance.

The events of the last parliamentary session is a classic example of what happens when you allow a government to feel



invincible. The more powerful the government gets, the more vulnerable the people become so that given time, the people will simply accept any treatment dished out to them.

Slowly but systematically the government is depriving the people of the appropriate avenue to seek redress for any wrongs committed by the government and big businesses which can afford to generate huge funds for the government. Thus, the partnership is now between the politicians in government and big businesses and there is no room for democracy, freedom and individual rights of the ordinary people. The slogan now is: 'I have the mandate by the people to do as I please'.

It is our view that the phenomenon of bribery and corruption is here to stay. It is not possible to eradicate it. However, we are further of the view that a far more sinister case scenario is now unfolding in this country as a direct consequence of corruption.

And that is, corruption has caused a far bigger problem and that is the systematic destruction of the concept of fair play by observance of established rules in an impartial manner. When you look at it closer, you will realize that this is the core function of the rule of law which in turn, sustains our parliamentary democ-

racy under a written constitution.

Yes, on a superficial level, the legal system in this country still functions daily but the concept of fairness that the legal system ought to sustain has long been corrupted so that issues of interpretation and application of the law including enforcement are not totally devoid of the spirit embodied in the legal and judicial system. Yes, we are enforcing the letter of the law, but not the spirit of the law which gives the legal system its sanctity or its moral foundation.

Take for instance, a case scenario where there is a police warrant of arrest for a prominent person. In the normal course of events, the criminal justice system should be allowed to take its course so that the police should proceed to arrest that person and bring him before the court of law to be dealt with. This is what happens in older democracies like England, Australia and New Zealand. In the normal course of events, the law courts in these countries will not grant orders stopping the police from performing their functions.

However, in this country, the superior courts like the National Court readily dish out court injunctions stopping the police from arresting people against whom the police have already obtained arrest warrants from the lower courts.

This is totally wrong for two reasons: Firstly, the superior courts must respect the integrity of the lower courts which have issued the warrants for arrest after consideration of the police case put before the Magistrate. Secondly, the criminal justice system must be allowed to take its

course without any interference from the superior court until the case, in its normal transition, reaches the superior court.

Unfortunately, in this country, the superior courts will jump the queue to stop the police and the lower courts from performing their routine functions.

The case of obtaining restraining orders against the Ombudsman Commission is another classic case of the superior courts interfering with the jurisdiction of the Ombudsman Commission. Where there is a leadership dispute between the leader and the Commission, the national court must not be allowed to grant injunctions against the Commission or the Tribunal from exercising their constitutional functions.

This is what we mean when we say that the whole system of interpretation and application of the law including enforcement have been corrupted in this country so that we are no longer enforcing the law within the spirit of the law.


Thus, if the leader has any complaints against the Commission or the Leadership Tribunal, then he has the right to go to the superior court to upset the decision of the Commission or the Tribunal AFTER these institutions have conducted their investigations and AFTER they have made their determinations known but NOT BEFORE. The law enforcement agencies, including the lower courts must not be stopped from their routine functions. The higher courts in turn must wait for the case to reach them in the normal course of events before they exercise their supervisory jurisdiction. In our

view, the superior courts of law are crossing bridges long before they even sight the bridges for themselves. They are corrupting the system of law and law enforcement in this country.

In conclusion, we say that bribery and corruption in this country is here to stay. Regardless of what effort we may put into the fight to control or even eliminate it, we will not succeed. The primary reason for our pessimism is that the people in positions which can make the difference are themselves corrupted so they are not likely to take any action against bribery and corruption. The very people who ought to take remedial action are the biggest beneficiaries of bribery and corruption themselves and they are the very people who are partaking in it.

This now takes us to the next level and that is on the moral plane. We can only call on these corrupt people to look at the phenomenon of bribery and corruption as a moral issue. We can only call on them to look deeply within and decide if they are doing the right thing. We can only plead for them to see that there is no self respect for anyone engaged in bribery and corruption and furthermore, there is no public respect for these people and their families. And ultimately, when it is time to die the fruits of bribery and corruption will not send these people to a happy life and neither will they take with them the proceeds of bribery and corruption.

We end with a biblical saying: "How does it profit a man if he gains the whole world but suffers the loss of his soul?"



Putim was long
40 Yias Anivesari
bilang Wantok Niuspepa
Spesol Saplimen
i kam klostu long dispela pepa bilang yumi ol PNG stret!

Keravat Nesenel Hai stap long hevi ...Skul i ken pas neks yia

Veronica Hatutasi i raitim

KERAVAT Nesenel Hai skul inap pas long neks yia sapos ol i no stretim ol klasrum, ol skul bilding na ol haus slip bilong ol sumatin na ol tisa.

Skul Gavaning Kaunsel bilong Keravat i bin bung las wik Fonde na wokim disisen long dispela samting.

Ol i putim askim i go long Nesenel Edukesen Bot (NEB) long pasim skul long 2011 na wetim NEB long glasim na skelim ol samting na givim bekim insait long tupela wik.

Keravat Nesenel Hai em wanpela long ol namba wan nesenel hai skul long PNG i kamapim planti ol bikman long kantri bai klostu pas

bikos i nogat mani long mekim ol wok mentenens long ol skul bilding na tu, sanapim ol nupela skul bilding. Antap long dispela, planti ol klasrum na haus slip em ol i olupela pinis na ol i laik pundaun. Na dispela i ken kamapim bikipela birua na dai long ol sumatin, ol tisa na ol famili na ol narapela woklain bilong skul.

Long dispela yia, i gat olsem 250 Gret 12 sumatin long skul. Bikos long hevi, ol i bin stopim ol nupela sumatin long kam insait long skul long dispela yia na i nogat ol Gret 11 sumatin nau, tasol ol Gret 12 sumatin tasol. Na i luk olsem dispela em ol laspela lain we bai stap inap pinis long dispela skul yia.

Bikipela namba olsem 70 pesen mak bilong ol sumatin i bilong Is Nu

Briten provins taim 30 pesen i bilong ol narapela provins long kantri.

Wantok i bin toktok wantaim wanpela wantaim Edukesen Dipatmen i lukautim ol Skul Etministresen na Liesen na ol Sekonderi na Nesenel Hai skul long kantri em Ouka Lavaki.

Taim em i mekim klia sampela samting i stap insait long ol hevi long Keravat na sait bilong mani long stretim ol skul bilding we bikipela hap em skul i no kisim, em i tok em i wanbel long disisen bilong Skul Gavaning Kaunsel long pasim skul neks yia.

"Mi sapotim disisen bilong Skul Gavaning Kaunsel long pasim skul bikos laip na stap bilong ol sumatin, ol tisa na ol famili bilong ol na ol narapela woklain i stap long hevi.

Planti ol klasrum na ol skul bilding i bagarap, ol windua i raus pinis, wara i kapsait i kam daun long ruf na moa.

"Wok long stretim ol skul bilding na ol klasrum em ol i bin toktok long en long longpela taim. Na dispela K7.8 milion long Restoresen Edukesen Sevisis Infrastraksa o RESI fan inap long helpim tru karimaut ol wok mentenens long ol skul bilding Tasol i luk olsem skul i yusim K2 milion long mekim ol wok na mani i no nap na ol wok i no pinis," Mista Lavaki i tok.

Dispela K7 milion RESI mani we ol i bin katim bilong mekim wok stretim long ol skul bilding long Keravat i bin stap aninit long Nesenel Plening na Monitaring ministri tasol sampela samting i no bin go stret

na skul i no kisim olgeta manimak.

Ombudsmen Komisin (OC) i laik karimaut ol wok painim long dispela, tasol em i no inap nau bikos long senis we Nesenel Eksekutiv i mekim long wok na pawa bilong em (OC).

Mista Lavaki i tok ol klasrum na ol haus slip bilong ol sumatin na tisa i bagarap pinis. Na skul i no kisim mani na i abrusim pinis 6-pela mun, tasol ol wok i no pinis.

Olsem na skul gavaning kaunsel i wokim disisen bilong pasim skul long neks yia. Samting i stap nau long han bilong Nesenel Edukesen Bot na Edukesen Minista i wokim las toktok long skul i pas o nogat.

Kolget Pamoliv givim K10,000 long Medikel bung

SAPOT long bikipela bung bilong ol dokta na helt sekta long PNG i save ron bikos long gutpela sapot i kam long ol praivet sekta na bisnis kampani na sampela gavanman dipatmen.

Bung i save laikim manimak long K500,000 long karimaut olgeta wok, ol wok redi olsem prinim ol pepa we ol i prisenim na wokim ol program long en, ples we ol lain i stap long konprens i slip long en, ol kaikai na dring bilong ol na long taim bilong holim bung insait long wanpela wik.

Long aste Trinde, kampani Kolget Pamoliv (Colgate Palmolive) i bin givim K10,000 donesen bilong em i go long Presiden bilong PNG Medikel Simposium o konprens, Dokta Mathias Sapuri, long sapotim namba 46 bung

bai kamap long Wewak, Is Sepik provins klostu long pinis bilong dispela mun.

Kampani Kolgeta Pamoliv i tok em i sapotim ol komyuniti helt program na ol i gat wok long helpim na lukim olsem ol pipel long PNG i kisim gutpela helt kea long orol (tit) na hans haijin. Sampela ol program ol i sapotim em long global komyuniti program, Brait o Gutpela Smail na Gutpela Bihain taim na Ol Klinpela Han long Gutpela Helt.

Kolget Pamoliv (PNG) i givim K300,000 sponsa long 5-pela yia i go long PNG Dentol Skul we i soim gutpela wok patna namel long pablik na praivet sekta lain. Long dispela, manimak long K200,000 i bilong apgre-tim trening laboretori na

K20,000 i bilong sapotim ol Helt na Basela bilong Dentistri Sejeri program.

Kampani ya i wok patna wantaim Kensa Rilif Sosaiti long sapotim pait agensim kensa na moa yet, kensa bilong susu i wok long kilim dai planti meri long PNG.


"Long wok bilong mipela long kamapim gut helt kea i go long pipel na strongim awenes long ol hekt isu long PNG, mipela i amamas na tokaut long givim K10,000 donesen mani bilong sapotim 2010 konprens bilong "Ol Laipstail Sik na Kensa", kampani i tok.

Long dispela wik Mande tu, Wol Helt Oge-naisesen (WHO) bos long PNG, Dokta Eigil Sorensen, i bin givim K10,000 i go long Dokta Sapuri olsem kontribusen bilong WHO long PNG Medikel Simposium.



AMAMAS LONG SKUL:

Sampela ol skul pikinini long Wod Strip Paimerri skul long Nesenel Kapitel Distrik i amamas pilai i stap long belotaim malolo bilong ol. **Fail Poto**



GIVIM: Marryanne Hereva em brens menesa bilong Kolget Pamoliv (PNG), Dokta Sylvester Lahe, Sekreteri bilong Medikal Kaunsol na Dokta Mathias Sapuri wantaim K10,000 sek moni i kam long Kolget Pamoliv. **Poto Nicky Bernard**

Moa long 13,000 Gret 12 sumatin long kantri sindaun long tes

LONG dispela kain taim olgeta yia, taim bilong wokim tes long ol sumatin insait long kantri i save stat.

Dispela i moa yet long ol Gret 12 na Gret 10 sumatin.

Long dispela wik Mande, moa long 13,000 Gret 12 sumatin long ol Sekonderi na Nesenel Hai skul long PNG i bin sindaun long Riten Ekspresen (Written Expression) tes bilong ol. Dispela em wanpela han long Inglis

Sabjek. Bikipela tes bilong ol Gret 12 bai kamap long wanpela wik, stat long Oktoba 18 na pinis long de namba 22.

Kaunim mak bilong ol Gret 12 sumatin long dispela yia i go antap long 13,719 na dispela em i 1,374 moa long mak bilong las yia em 12,354. Dispela em bikos ol namba bilong ol sekonderi skul long kantri i go antap moa7-pela moa sekonderi skul i kamap we nau, i 99 sekonderi

skul long kantri.

Long bikipela namba bilong ol sumatin i save wokim Gret 12 olgeta yia, tasol Nesenel Edukesen sistem i save kisim samting olsem 6,000 i go long ol yuni-vesiti na ol tesimal institusen na ol tisa na nesening kolis i kam aninit long em. Ol narapela i save painim ol narapela rot long skruim skul bilong ol long ol teknikel, CODE senta na ol arapela praivet skul moa.

Ol wok redi long seremoni bilong santuim 6-pela i go het

... McKillop bilong Australia i wanpela long ol

OKTOBA 17 long kalenda bilong Katolik Sios long wol bai bikipela de bikos hetman bilong sios long wol, Pop Benedict 16, bai wokim seremoni lotu long givim luksave blesing long 6-pela santu lain husat i bin mekim ol gutpela wok long laip bilong ol.

Dispela 6-pela em: Namba wan Katolik santu bilong Australia em Bleset Mary McKillop, husat i bin statim Kongrikesen bilong ol Sister bilong Sen Josef bilong Sekret Hat. Mama i karim em long Janueri 15, 1842 long Fitzroy, Australia. Na em i bin dai long Ogas 8, 1909 long Sidni (Sydney), Australia. Narapela em Bleset Stanislaw Soltys ol i kolim em long Kazimierz husat i profesa pater long Canons Regular bilong ol Lateran. Mama i karim em long Septemba 27, 1433 long Kazimierz long kantri Polan. Em bin dai long Mei 3, 1489. Narapela em long Bleset André Bessette bilong relijes Kongrikesne bilong Holi Kruse. Mama i karim em long Sen-Grégoire d'Iberville, Kanada long Ogas 9, 1845 na em bin dai long Montreal, Kanada long Janueri 6, 1937. Narapela em long Bleset Candida Maria bilong Jesus, husat i bin statim Kongrikesen bilong Daughters bilong Jesus. Mama i karim em long liklik ples Berrospe, Andoin, Guipuzcoa long kantri Spain long Mei 31, 1845 na em i dai died long Ogas 9, 1912.

Narapela tupelo i bilong kantri Itali. Em long Bleset Giulia Salzano, husat i bin painim Kongrikesen bilong Kateketikel Sistas bilong Sakret Hat. Mama i karim em long Oktoba 13, 1846 long Santa Maria Capua Vetere long Itali na em i dai long Mei 17, 1929 long Casoria, Italy. Na laspela em Bleset Camilla Battista da Varano, bilong Sistas bilong Poor Clares na i bin statim monestri bilong Santu Clare long Camerino, Itali. Mama i binkarim em long Epril 1458 long Camerino, Itali na em bin dai long Mei 31, 1524.

Ol Katolik pipel long Australia i wok long mekim ol wok redi long dispela bikipela de long sios long kantri bikos em i namba wan santu bilong ol.

Asbisop Kadinel George Pell bilong Sidni Asdaiosis taim em i amamas long dispela nius long stat bilong dispela yia i bin tok "Mary McKillop i sanap long namel bilong histri bilong Katolik Sios long Australia husat i gat bikipela lewa long pogivim na soim komitmen bilong em long ol wanwok Sister long kongrikesen na tu, long ol sios lida husat i no bin mekim em gut long sampela taim. Tasol Mary em i olsem yumi tasol em i wanpela rol modol long olgeta lain long Australia," Kadinel Pell i bin tok.

Pastaim Praim Minista bilong Australia, Kevin Rudd i bin tok

"long Mada Mary McKillop i kamap santu em i bikipela samting na i givim gutpela skul long ol pipel bilong Australia."

Em bin tok dispela em i bikipela samting long samting olsem 5 million Katolik pipel bilong Australia.

Kongrikesen bilong Sisters of Sen Joseph bilong Sekret Hat we Bleset Mary McKillop i bin statim i kirapim ol skul na ol sariti ogenaissen long planti hap bilong Australia we i lukautim ol pikinini papamama i dai, ol i lusim tingting long ol, ol lain i nogat ples bilong stap, ol sik na ol lapun. Nau i dai Pop John Paul II i bin santuim em long kamap Bleset Mary McKillop.

em Ol Sisters bilong Sen Josef, Sidni Asdaiosis na Katolik Bisops Konprens bilong Australia i makim Harvest Pilgrimages long go pas long ol menesim ol wokabaut pipel long Australia i mekim i go long Rom long seremoni bilong santuim Bleset Mary McKillop na ol narapela 5-pela..

Menesing Dairekta bilong Harvest, Philip Ryall, i tok planti tausen pilgrim bilong Australia bai

Mekim wokabaut i go long Rome long seremoni.

"Dispela bai i wanpela bikipela samting long histri bilong kantri bilong yumi. Mipela i amamas long helpim ol lain husat bai stap long seremoni na lukim stret ol samting long ai bilong ol," Mista Ryall i tok.



Mi Lukim Ranuguri Setelmen

TUPELA wik i go pinis, mi bin go lukim sik manmeri na lapun bilong Ranuguri setelmen long Konedobu insait long Hanuabada peris. Mi no save long ples yet, olsem na tupela memba bilong Lijin Maria in bin kam wantaim mi. Mipela i no go long kar. Bikos mi nupela man, olsem na mi laik wokabaut. Taim bilong wokabaut em i gutpela, bikos mi bai bungim planti manmeri na pikinini, na mi inap long lukim gut ol ples mipela i wokabaut long en.

Ranuguri em i wanpela setelmen i stap long maunten. Manmeri bilong dispela setelmen i kam long Kerema. Sampela i bin stap longpela taim, sampela i nupela. Sapos yu kam long kar long Hohola, bihainim Poreporena Friwe, Ranuguri Setelmen i stap long lep han bilong yu taim yu go daun long friwe na go long SVS Fudlen Harbor City.

Taim mi lukim dispela ples, mi pilim sori long manmeri na pikinini i stap long hap. Long olgeta kona yu bai lukim planti pikinini i stap. Em i maunten ples na ston i pulap. Haus bilong ol i klostu klostu na ol samting ol i wokim ol haus long ol i nogat gutpela. Olsem na mi tingim, memba bilong ol i save kam lukim ol o nogat?

Namba wan lapun man mipela lukim, nem bilong em Henry. Em i bilong Kerema, wanpela eksevisman. Nau em i kamap lapun tru na i no inap wokabaut moa. Taim em i lukim mi, em i amamas tru. Bikos, em i tok; "Em nau. Pater yu kam pinis. Mi laik tokim yu olsem mi laik go nau ya!"

Na mi askim em, "Yu laik go long we?"

Em i tok: "Mi laik go antap. Bikos mi les pinis long stap long hia".

Mi bin wokim fani long em, "Yu laik go antap long we? Antap long diwai o antap long ruf bilong haus o antap long maunten?"

Na em i bekim; "Pater, yu tu ya! Mi laik go antap long Heven bihainim meri bilong mi". Em i laik dai nau, bikos em i tok em i bin karim planti hevi pinis. Bihain mi askim em olsem em i redi pinis long go o nogat? Em i tok ya, mi redi pinis.

Taim mi tokim em long kaikai gut, slip gut, waswas na bihainim wanem samting pikinini bilong em i sevem em. Pikinini meri bilong em i save lukautim em i tokim mi olsem papa i no laik was was. Na sampela taim em i no laik kaikai tu. Em i save tok, "Mi les long was was. Mi laik go nau".

Taim mi harim olsem, mi tokim em; "Ahaa....nau mi save bilong wanem yu no go yet. Bikos long les pasin bilong yu, God i no laik kisim yu. God i bin salim angelo bilong em i kam, tasol taim ol i kam long haus, na lukim yu i no was was....olsem na ol i go bek. Sapos yu bin waswas na kaikai gut, ating ol i bin kisim yu go long Heven pinis. Yu mas kaikai long kisim strong na wokabaut wantaim Angelo. Angelo i save stap klin oltaim, olsem na taim ol i lukim yu i stap deti, ol i go bek".

Taim em i harim mi tok olsem, em i lap na tok; "Ok Pater. Tude bai mi waswas na kaikai planti".

Tasol mi tokim em, "yu noken hop olsem bihain long waswas na kaikai tude, Angelo bai kam wantu tasol. Nogat. Ol bai lukluk sapos yu bai waswas na klin olgeta de o nogat. Sapos yu waswas tude tasol, mi bilip olsem Angelo bai no inap kam. Olsem na yu mas waswas na stap klin olgeta de. God bai amamas long lukim dispela pasin bilong yu".

Luteran Sios bai strongim wok long helpim ol hangere na AIDS lain

LUTERAN Sios long PNG wantaim moa long 1 milion sios memba bilong em i wokim strongpela toktok long bung wantaim ol narapela Kristen sios long wol long givim kaikai long ol pipel i hangere i stap na ol dispela i gat AIDS.

Hetbisop bilong Gutnius Luteran Sios long PNG, Bisop David Piso i tok olsem taim em na hetbisop bilong Evanjelikel Luteran Sios long PNG (ELC/PNG), Reveren Giegere Wenge i kam bek long bung bilong Luteran Wol Federesen (LWF) long Stuttgart, Jemani.

Gutnius Luteran em i hap bilong ELC/PNG.

Namba 11 asembli bilong LWF i bin stat long Julai 20 na pinis long de namba 27.

Long wankain taim, Bisop Piso na Bisop Wenge i bin askim LWF bilong givim ol helpim mani long pait agensim hevi bi-

long klaimet i senis long PNG.

Bisop Piso i tok tupela i bin askim LWF long fandim ol progrem long sios bilong ol olsem long HIV/AIDS, edukesen, evanjelaisesen na hevi we klaimet i senis i kamapim long en.

Bisop i tok helpim mani bilong karimaut ol program bilong hevi we klaimet i senis i kamapim long en em i nupela askim we LWF i lukluk nau long en.

Em i tok hevi we klaimet i senis i kamapim long en em i bikipela samting. Olsem na em i tok ol sios i mas wok bung wantaim nesenel gavman na Yunaitet Nesens bilong daunim ol klaimet i senis hevi long wol na PNG wantaim.

Wantaim het tok bilong kompres em, Givim mipela kaikai bilong mipela long olgeta de", asembli i bin askim olgeta long bung wantaim ol narapela Kristen sios long wol long givim

kaikai long ol pipel i hangere i stap na ol dispela i wok long dai long hangere.

Em i tok tu olsem ol bai sios bilong ol bai giivm kaikai na helpim olsem ol

Kristen i go long ol lain i stap wantaim AIDS, givim kaunseling i go long ol lain wantaim AIDS binatang na ol manmeri i lukluk nogut long ol.



GOOD SAMARITAN: Wanpela sios grup i wokim pilai drama long "Good Samaritan" long wanpela bung long Holiday Inn. Poto: Veronica Hatutasi

Mis BSP i winim 2010 Ret Kros Kwin resis

CROWNE Plaza long Mosbi i bin pulap tru long las wiken Sarere Ogas 7 long ol spona na pipel husat i bin go long stap long sere- moni we i lukim Mis Beng Saut Pasifik 2010 em Rachael Sapery James i winim taitel bi- long Mis Ret Kros PNG 2010 resis.

Mis Sapery James, i gat 26 krismas i bilong Nu Ailan provins. Papa i bi- long kantri Jemani na mama Nu Ailan. Em i wok wantaim Beng Saut Pasi- fik Beng long Pot Mosbi.

Mis Sapery James i bin pinisim skul long wanpela yunivesiti bilong Jemani na i kisim digri long En- vironmen Saiens. Dis- pela em wanpela eria we Mis Sapery James i wok hat long en long karimaut ol wok awenes bilong sevim environmen.

Eitpela yangpela meri i makim Mosbi, Manus na Goroka i bin sanap long Mis Ret Kros PNG 210 resis. Long dispela yia, resis i bin narakain na i lukim sampela senis. Wanpela em long ol meri i sanap long resis na PNG



MIS PNG: Wina bilong MisPNG 2010, Mis Rachael Sapery James amamas na sindaun long sea wantaim ol arapela kontesten. *Poto: Nicky Bernard*

Ret Kros Sosaiti yet long PNG i painim ol spona bilong ol. Dispela spona i mas kamap wantaim K30,000 flet reit spona mani.

Mis Sapery James i bin mekim gut long olgeta seksen we ol jas i glasim na skelim ol long en na em i winim tupela nara- pela prais antap long kisim top prais long Mis Ret Kros PNG 210. Tu- pela em, Humanitarian o pastaim Sariti prais na Mis Patron's Sois.

Taim em i kirap nogut tasol amamas long winim top prais long dispela yia, em i tok olgeta meri i bin stap long resis em ol win- meri bikos olgeta i wok hat long kamapim mani bilong Ret Kros long helpim ol turangu lain na taim kantri na pipel i bungim hevi long ol bikpela birua olsem guria, solwara i solap na bagarapim ples, graun i bruk na moa ol birua olsem.

Namba wan rana ap

em Michelle Mondia we PNG Australia Alumnai Asosiesen i bin sponsaim taim Mis Manus Snax Vanessa Knight em namba tu rana ap.

Ol narapela meri long resis husat i bin winim ol prais em long dispela nait em long Mis Nesenel Gaming bot 2010 em Nicole Jeune husat i bin winim Mis Prensip. Na Mis Dijisel Boroko Roteri em Hariessa Tau i bin winim Mis Potojenik.

Resis i bin kamapim manimak long K240,000.

Wokim ol Meri Seif Haus long olgeta provins ...24 awa Hotlaim telipon i mas stap

Veronica Hatutasi i raitim

I GAT strongpela singaut long wokim ol Seif Haus ol meri ol man i paitim na na tu, bagarapim ol i ken kisim helpim, long olgeta provins bi- long kantri.

Wanpela man husat i no laik nem bilong em i kamap long niuspepa i tok pasin bilong paitim na bagara- pim ol meri i wok long go bikpela na olsem, ol atoriti i mas putim ol Seif Haus bilong ol meri ol man i paitim na bagarapim ol.

Em i laikim tu niuspepa, redio na TV i mas putim long ples klia ol telipon namba na nem bilong ol lain we ol meri i ken kisim helpim hariap long ol taim hevi na birua i kamap. Na em i singaut long polis, Komyuniti Developmen Minista Dame Carol Kidu, ol sios, Pot Mosbi Jenerel Haus sik na ol Non Gavman Ogenaisesen (NGO) long toktok strong givim sapot bilong ol

na dispela (Seif Haus long olgeta provins) samting i ken kamap.

"Mipela i laikim Seif Haus bilong ol Meri long ol lain we ol man i paitim na na tu, bagarapim ol i ken kisim helpim, long olgeta provins bi- long kantri. Mipela i laikim ol nau. Hamas taim moa bai ol tok nogut bilong man i wok long biruaim tu- rangi meri i no strong na i wok long singaut long helpim bai mipela i harim? Hamas taim moa bai ol meri PNG i karim hevi na birua? Las nait em i kamap long Godons insait long Nesenel Kapitel Distrik, baksait long Limana Vokesenel skul.

"Mi singaut long polis, Komyuniti Developmen Minista Dame Carol Kidu, ol sios, Pot Mosbi Jenerel Haus sik na ol Non Gavman Ogenaisesen (NGO) long toktok strong givim sapot bilong ol na dispela ol- geta provins long kantri i ken gat wanwan Seif Haus. Plis raitim ol 24 awa telepon namba Helplain long ol

nuspela, redio, TV na ol notis bot long ol komyuniti senta na ol lukim na wokim samting long helpim ol meri. Yumi mas stopim dispela ol nogut pasin i wok long bagarapim na kilim dai ol mama bilong yumi, ol susa, ol pikinini meri na ol kandere.

"I mas gat ol polis wantaim tren- ing i stap we ol i ken singautim o ringim ol husat i mas givim helpim hariap taim ol i putim ripot long ol. Yumi mas gat polis hotlaim we komyuniti i ken yusim long putim ripot bilong ol. Moabeta Dijisel na bemobail i helpim long sanapim dispela (Hotlaim). Domestic Vio- lence o pasin long paitim na bagarapim meri insait long famili i wok long bagarapim ol famili na so- sait. Yumi mas mekim samting nau long rausim dispela sik nogut. Em bai no isi, tasol sapos yumi wokim nau long helpim ol lain i bungim bagarap long dispela rot, yumi holim han na toktok wantaim, yumi ken mekim samting," man ya i tok.

Raun lukim ol meri na pikinini



TINGIM 40 BONDE KEIK: Kaia Tau na Janice Dingel i wok long sanapim ol kendel- 40 olgeta long makim 40 yia bilong Wantok Niuspepa.

Poto: Veronica Hatutasi



STAILIM: Wantaim ol naispela bilas, tripela yangpela meri sumatin bi- long Caritas Gels Teknikel Sekonderi skul i amamas long stap insait long Kalserel de bilong skul.



OL FAMA MERI: Dispela em sampela ol memba bilong PNG Wimen in Agrikalsa Asosiesen long PNG.



OL SIOS MAMA GRUP: Ol mama grup long DBTI Katolik Katitrel long Taurama, NCD.

**PNG givim
CEDAW
ripot
long UN**

MASKI yumi leit long 15 yia, PNG i bin givim ripot bilong em long Konvensen bilong rausim ol kain pasin long ra- bisim na bagarapim ol meri ol i save kolim CEDAW, i go long Yunaitet Nesens las wik.

Komyuniti Developmen Minista Dame Carol Kidu i

bin go pas long wanpela grup i bin go long Yunaitet Nesens hetopis long Nu Yok (New York) na prisenim CEDAW ripot bilong PNG na Bogenvil.

Long las wik, Dame Carol i bin singautim wanpela bung long toktok long wokabaut long grup bilong em na

presentesen bilong ol.

Dame Carol i tok na ol lain i go pas long dispela eria bin amamas long kisim presente- sen bilong nambawan ripot i gat long em kombain namba wan, namba tu, namba tri na namba foa CEDAW piriet ripot bilong gavman bilong PNG na Bogenvil.

Ol sampela Non Gavman Ogenaisesen i bin redim tu ripot bilong ol we ol i bin pris- enin wantaim ripot bilong PNG gavman.

Ol ripot i tok Dame Carol i kros long ripot bilong Amnesti Intanesenel we i tok olsem puripuri i save kamapim HIV/AIDS, ol i kilim

50 meri long PNG bikos ol i sutim tok long ol olsem ol puripuri lain na ol kain samt- ing ,oa olsem. Dame Carol i tok grup bilong em i bin save ol i leit wantaim ripot tasol em i bin mekim klia i go long komiti ol as na watpo PNG i leit long givim ripot bilong em.



TOK PISIN NEWS
from Radio Australia
radioaustralia.net.au



Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 12800(KHZ)

Wanpela liklik sunami kamap klostu long Vanuatu

LONG Vanuatu, wanpela liklik sunami i bin kamap klostu long Vanuatu bihain long wanpela guria i bin hamarim dispela Pasifik ailan kantri.

Tasol i kam inap nau, i nogat ripot long ol bikpela bagarap o ol pipel i kisim bagarap o indai.

Rebecca Armitage i ripot ol witness i tok strong bilong guria long 7.5 i bin sekim ol bilding na haus na pundaunim ol pawa lain long Efate ailan.

Liklik taim bihain, ol i bin lukim wanpla liklik sunami o si bruk, em ol i makim long 23 sentimita, arasait tasol long kapitel Pot Vila.

Pasifik Sunami Woning Senta i tok ol pipel i ken lukim ol bikpela si bruk insait long arapela hap bilong kantri.

Olsem na ol atoriti i givim wanpela tok lukaut long ol pipel i mas muv i go antap long ol maunten eria.

Vanuatu i stap insait long wanpela hap ol i kolim 'Pasifik Ring of Fire' bikos long ol guria na volkeno pairap raun long en.

Vanuatu long dispela ol mun i go pinis i wok long bungim sampela bikpela graun guria.

Long wankain taim, ol das bilong maunten paia i wok long stopim ron bilong ol 'domestik flait' insait long Nu Kaledonia.

Bipo paitman bilong Solomon Ailans winim sia long ilek-sen

WANPELA bipo milisia lida husat i bin stap long kalabus 5-pela yia i winim pinis wanpela sia insait long Solomon Ailans ilek-sen.

Jimmy Lusibaea i winim bikpela namba bilong ol vout insait long Not Malaita konstituensi bilong en.

Mista Lusibaea, husat i bin yusim nem Jimmy Rasta, insait long 'etnik' pait long Solomon long 5-pela yia, we planti handret pipel i bin dai.

Em i bin lidim Malaita Eagle Fos pait lain na i bin wanpela long ol biknem milisia lida, polis i holim kalabus long 2003 bihain long givim olgeta gan na ol samt-ing bilong pait long ol i ken kisim 'amnesti' na i go kalabus.

Malaita Eagle Fos i no moa wok.Em i bin go kalabus long 5-pela yia bilong paitim narapela man na stilim ol samt-ing we kot i rausim sampela sas.

Em i tokim ol ripot ol pasin militen i helpim em long kisim 'rispek' bilong komyuniti bilong en.



BIRUA: Dispela bikpela kontena sip nem bilong en MSC Chitra i silip sait long solwara bihain long em i bungim birua long India. Ol kosgat bilong India i wok traim pasim wel i wok kapsait kamaut long dispela sip we i bin bam wantaim narapel sip klostu long nambis bilong Mumbai.



WAN MILIAN: Australia Bisnisman Dick Smith i rausim sampela mani long sutkes we i gat \$1 milian long Sidni aste. Dispela wan milian dola em Mista Smith i givim aninit long wanpela awot em i kolim Wilberforce Awot, we bai go long wanpela yangpela manmeri aninit long 30 krismas husat i ken soim lidasip long tokautim wanpela rot bilong slekim namba hevi bilong ol manmeri long Australia na senisim luksave long groa bilong ekonomi.

Taitwara long Pakistan i kamapim bikpela krais

LONG Pakistan, Yunaitet Nesens i tok taitwara i kamapim wanpela bikpela bagarap long laip bilong ol pipel insait long histori long kantri.

UN i tok dispela disasta i kamapim bagarap long moa pipel insait long sunami bilong 2004 na guria insait long Haiti i no long taim i go pinis.

Samting olsem wan tausen siks handret pipel i dai pinis na klostu long 14 milian narapela taitwara i bagarapim laip bilong ol.

Pakistani Prait Minista Yousaf Raza Gillani, i tok dispela i wanpela bikpela salens kantri bilong en i bungim.

Em i singautim intanesenel komyuniti long halivim ol.

Bom i kilim 6-pela polisman long Afganistan

SIKSPELA polisman i bin dai bihain long tupela bom i pairap insait long Saut hap bilong Afganistan.

Insait long namba wan pairap, faivpela opisa i bin dai taim wanpela bom i pairap antap long kar bilong ol, insait long Khanishin distrik bilong Helmand provins.

Deputi polis sif bilong provins i sutim pinga long ol Taliban paitman.

Narapela polis opisa i bin dai bihain long ol paitaman, wantaim ol roket bom na masin gan i bin paitim wanpela polis pos insait long Musa Qala distrik.

Taitwara long Saina i kilim moa long wan tausen pipel

MOA long wan tausen pipel ol i bilip i dai pinis taim ol pipel i go pas long helpim ol pipel i wok long painim ol 'savaiva' insait long bikpela graun bruk na taitwara long notwes bilong Saina.

Ol atoriti i tok ol i wok long painim samting olsem wan tausen wan handret pipel, bihain long wanpela bikpela hap bilong graun malumalum na ston i pundaun antap long ol viles insait long Gavnsu provins na kilim klostu 330 pipel.

Nau yet, ol enjinia i wok long traim kamapim wanpela baret i go insait long wanpela 'leik' o raunwara, em graun bruk i kamapim na sapos ol i no stretim, em bai brukim banis i go daun long ol haus na pipel.

Premia bilong Saina, Wen

Jiabao, i mekim wanpela askim i go long ol reskiu wokman long mekim olgeta samting long painim moa ol manmeri i stap laip yet.

Tasol dispela ol wok helpim i luk olsem bai slo long wanem ol i ting bikpela ren na win bai kamap long dispela rijen klostu.

Ol papagraun long Nothen Teritori bilong Australia i amamas

WANPELA papagraun insait long Noten Teritori bilong Australia i tok em i amamas na praud olsem Federal Gavman i wanbel long bungim graun bilong en i go insait wantaim Kakadu Nesenel Pak.

Maining kampani bilong Frans, Areva i bin laik mainim 5 bilian dola uranium diposit antap long graun ol i kolim Koongarra.

Tasol Envaironmen Minista, Peter Garrett i tok Labor Gavman, sapos ol i makim ol gen, bai surikim Kakadu i go moa long narapela 12 handret hekta long stopim ol maina i bagarapim graun.

Wanpela papa graun, Jeffrey Lee, i tok em i wok bilong en long lukautim graun, em lapun na bubu bilong en i givim em.

"Mani i no wanpela samting long mi. Graun bilong mi tasol i bikpela samting. Taim yu digim wanpela hul long dispela graun, yu wok kilim mi. Bikos mi no nidim mani, mi no wari tumas long mani."

Federal Oposisen Pati bilong Australia i promis long glasim visa sistem

OPOSISEN Pati bilong Australia i tok sapos em bai glasim ken wei ol i skelim ol Australia visa long olsem sistem i ron gut.

Mausman bilong Imigresen long Oposisen, Scott Morrison, i tok em i wari long yusim ol lokol pipel long wok insait long ol Australia ovasis opis husat i save stretim ol visa pepa.

Em i tok em i save long ol tok-tok em i kisim long 'braiberi na frod', wantaim tu diskriminesen long sait bilong 'res na lotu bilip'.

Mista Morrison i tok olsem na ol senis i mas kamap.

Mista Morrison i kam bek long wanpela sotpela raun i go long Nauru na i tok kantri i redi long opim gen senta bilong kisim ol asailum sika sapos Australia i sainim wanpela nupela agrimen wantaim ol.

PacificBEAT

4. 5. 6am & 4pm. 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



WANTOK TEAM: Opis wokmanmeri bilong Wantok Niuspepa na spot kolumnis bilong Wantok Niuspepa, Scott Vavine i selebretim 40yia selebresen wantaim bipo wokman bilong Wantok na nau Gavana bilong NCDC Hon. Powes Parkop long Wantok opis las wik Fonde. Poto: Wantok Niuspepa

Planti manmeri i stap long hatwok bilong wan wan ol manmeri

Veronica Hatutasi i raitim

WANPELA kain wokbung i bin stat 40 krismas i go pinis namel long ol bikpela sios long PNG long givim sans long ol grasrut pipel long ritim save long ol samting i kamap long PNG na ovasis, kisim skul na glasim na skelim ol samting long mekim ol disisen long laip, i bin makim bonde bilong em long las wik Fonde Ogas 5.

Dispela em Wantok Niuspepa, pepa bilong ol PNG stret we Katolik Sios na moa yet, Divain Wod Misinari (SVD) kongrikisen, Luteran, Anglikan na Yunaitet Sios i bin statim long Wirui Katolik Misin long Wewak, Is Sepik provins long Ogas 5, 1970.

Katolik Bisops Konprens (CBC) i bin makim (nau i dai)SVD pris, Pater Frank Mihallic olsem long statim wanpela niuspepa bai sanap olsem maus bilong ol grasrut na glas bilong

sosaiti. Na tru yet, samting em i bin statim 40 krismas i go pinis i go het yet long mekim wok, maski ol taim i senis na planti moa salens i stap long nupela wol i gat ol nupela teknoloji na planti ol kain rot long pipel i kisim nius na ol toktok long laip na wok long PNG na ovasis.

"Wantok em i olsem juwel na i sanap strong namel long niuspepa bilong yumi," Siaman bilong mama kampabi bilong, em Wod Pablising kampani, Pater Janusz Skotniczny i bin tok insait long wanpela liklik sere-moni ol woklain bilong Wantok i bin holim long opis tasol las wik Fonde. Namel long tupela Wod Pablising kampani Bot memba, 15-pela woklain na liklik lain niuslain bilong ol narapela media, Nesenel Kapitel Distrik Gavana na olpela wokman bilong Wantok em Gavana Powes Parkop i bin kamap long dispela liklik 40 anivesari bung.

Taim em i tok tenkyu long liklik lain wok manmeri i save kamapim Wantok Niuspepa long wanpela de olgeta wik, Pater Janusz i bin glasim ol long toktok bilong bipo nau i dai Praim Minista bilong Ingran long Wol Wo 2, Se Winston Churchill i go olsem: "Planti manmeri i stap gut long hatwok bilong wan wan ol manmeri" (So many owe so much to so few).

"Tru, toktok bilong Se Winston Churchill i sutim Wantok. Hatwok bilong liklik lain manmeri i save bringim gutpela nius, hop na literesi i go long pipel long olgeta hap bilong PNG na sampela we ol i lusim tingting long ol.

"Namel long ol akaivs o ol buk bilong Divain Wod long Madang, mi lukim pas bilong pastaim Praim Minista Paias Wingti em i wokim long Februeri 1,1986 we em bin tok Wantok i niuspepa bilong ol ples lain long PNG, The Times of PNG i bilong ol

lain i kisim skul na i gat save taim The New Nation megesin i bilong ol yangpela pipel.

"Wantok i wok i stap yet na i kamap gutpela moa taim ol yia i ron, Wanpela de, tupela susa Inglis pepa bilong em bai kam bek," Pater Janusz i tok.

Jenerel Menesa bilong kampani, em Elizabeth Konga i bin tok taim PNG i muv fowet long developmen bilong em na kisim indipendens, Wantok i bin stap olsem maus bilong pipel autim ol trupela tok-tok,kisim infomesen i go aut long pipel, promotim literesi na ol Kristen velyu long mak yet bilong em long kontribuit long ol wok developmen bilong PNG.

Mis Konga i tok "tru, ol salens i stap, tasol wantaim sapot i kam long gavman, ol bisnis na praivet sekta na famili, Wantok bai go het mekim wok long stap olsem maus na yau bilong ol pipel bilong long 40 yias moa i kam.

WANTOK KOMENTRI

Watpo yumi no inap luksave long strong bilong tok inglis

MIPELA wanpela tok pisin niuspepa, olsem na ating bai yu tingting planti liklik long fran pes stori bilong mipela dispela wik, na watpo mipela i wok autim tingting long ol pikinini bilong yumi mas save gut long tok inglis.

Yes, i tru olsem tok pisin em i tokples bilong yumi olgeta long kantri, tasol i gat planti arapela samting we yumi PNG i mas klia long en, we Tok Inglis em i tokples long kisim save long en.

Planti ol bikpela wok na skul bilong yumi long yuni-vesiti, em i no stap long tok pisin yet.

Planti ol wok na vokesenel skul bilong yumi tude, i no stap yet long tok pisin.

Olsem na strong bilong ol sumatin bilong yumi long save long tok inglis, em i bikpela samting yet.

I gat planti arapela kantri long wol we skul na olgeta wok skul, em ol i tanim i go pinis long tokples bilong ol.

Tasol wankain olsem yumi, ol tu i luksave olsem i gat nid i stap long ol sumatin bilong ol i mas save gut long tok inglis.

Em bikos, wankain olsem yumi, kantri bilong ol i no stap ol yet.

Long wokbung wantaim ol arapela kantri long wol, i mas i gat tok ples we olgeta yet i save long en.

Olsem na wankain olsem tok pisin em i wanpela tokples we yumi wan wan bilong wan wan ples long PNG i ken luksave na yusim bilong wokbung, tok inglis em i wanpela tok ples we olgeta kantri long wol i luksave long en.

Wari bilong ol tisa bilong yumi long Morobe, olsem dispela sistem bilong givim skul long ol yangpela bilong yumi i no gutpela tumas long sait bilong strongim save bilong ol long tok inglis, em i wari we yumi noken abrusim na haitim.

Dispela wari bilong ol em i gat as sapos yumi laik redim gut ol yangpela bilong yumi long go aut na mekim wok bisnis na skul wantaim ol arapela kantri long wol.

Ol bikpela risos projek we yumi wok skin kirap long kisim long kantri bilong yumi i lukim gavman i go het long strongim ol wok na skul vokesenel long gat inap wokmanmeri long kantri long wok long ol dispela ol bikpela risos projek.

Tasol luksave tu i mas go long skulim gut ol sumatin bilong yumi long tok inglis.

Sapos skul sistem yumi gat nau i no nap long strongim save bilong ol long tok inglis, orait, gavman, na edukesen dipatmen i mas lukluk long en.

Ol i tok dispela Autkams Bes Edukesen (OBE) sistem em i gutpela bilong ol develop kantri long wanem ol rurel erias bilong ol i gat ol samting olsem intanet na kompyuta samting.

Yumi long PNG i no stap long mak wankain olsem ol yet, olsem na eduksen dipatmen i noken pasim ai na ia bilong ol long dispela wari bilong ol tisa long Morobe.

Ol i gat as long autim tingting bilong ol.

Gavman, mekim samting stret.

WANTOK

Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Neville Choi

Published at

Section 56, Allotment 3

Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Nogat gavman opisa kamap long Nesenel Midia Konprens

Sape Metta i raitim

BIKPELA kros toktok i kamap long namba wan bikipela konprens bilong Midia we ol i mekim long Goroka, long dispela wik.

As bilong dispela kros i stap long ol mausman bilong ol gavman opis long provinsel na nesenel level i no bin kamap long stap sindaun long dispela bikipela bung bilong midia.

Dispela ol lain husat i ken wokim ol bikipela disisen long ranim kantri bilong yumi, na tu ol i save yusim ol sevis bilong midia long mekim ol toktok na ol arapela imfomesen i go long ol pipel, i no bin lukluk na wari liklik long kamap na sindaun long dispela bung.

Ol lokol, provinsel na nesenel lida na politisen, gavman opisa na mausman long ol gavman ejensi na ol arapela gavman dipatmen i no bin kamap, na dispela i soim klia olsem ol i nogat gutpela tingting long sapotim kain ogenaísesen we i save wok hat tru long kamapim na bringim imfomesen i go daun long ol

pipel bilong PNG.

Na dispela i soim klia tu olsem dispela ol lain i gat bikipela hevi tru long ol pasin bilong ol.

Em sampela ol strongpela toktok bipo edita bilong Post Courier na tu olpela presiden bilong PNG Midia Kaunsel, Oseah Philemon, i bin mekim long taim em i kamap long sindaun wantaim ol arapela midia lain wokman-meri na ol opisel bilong ol sponso ogenaísesen em UNDP, Ausaid, Nambawan Fainens, National Gaming Control Board na Daltron.

“Sapos yumi ol midia lain i sindaun nating na i no nap long wokim wangepela samting long ol lain husat bai i ken kamap na helpim, bai yumi ken lukim planti ol mama bai ken lusim laip bilong ol long taim bilong karim. So yumi mas opim maus na toktok planti so wok bilong metenel helt bai ken kamap gut, daunim motaliti o dai bilong ol pikinini, pait agensim HIV AIDS – sik malaria na ol arapela sik, traim long daunim na rausim hanger (poveti), strongim eduke-sen na skul bilong ol pikinini, strongim

wok bilong ol meri (empower women), lukautim gut ol envairomen bilong yumi we i ken stap longpela taim na kamapim pren na gutpela patnasip long wokbung wantaim ol arapela ovasis kantri,” Mista Philemon i tok.

Em i tok i gat planti ol kainkain hevi na ol arapela bikipela samting tu we i wok long kamap insait long sosaeti bilong yumi, “tasol husat bai kamap olsem ol mausman na meri long tokaut long dispela ol hevi, so ol lain husat i save helpim bai i ken lukluk na traim long stretim dispel ol hevi”.

“Yumi i ken lukluk na traim long helpim na tu yumi gat ol eims na gols, tasol bai yumi mekim wanem. Sapos ol lida bilong yumi gat bikipela hevi tru long pasin bilong ol, yumi mas wok hat long brukim i go daun dispela ol pasin bilong ol, na ol i ken luksave long ol dispela isus (issues) na tu bai yumi i ken wok bung wantaim long atresim dispel ol isus.

Helt seketeri bilong Pot Mosbi General Hospital Dokta Clement Malau husat em wangepela representative long helt dipat-

men i tokaut tu long dispel konfrens olsem em i tru olsem planti ol mama i save lusim laip bilong ol long taim bilong karim.

“Na bikos i nogat ol gutpela na raitpela ol ikwipmen na ol arapela ol masin samting long helpim ol mama, turangu planti long ol mama i wok long lus”.

Em i tok long opisel helt ripot em i soim olsem fopela mama i save dai long wanwan de na 1,300 long wanwan yia long taim ol i go long leiba.

Dispela em i bikipela hevi tru na yumi stap daunbilo tru winim Solomon Ailan na ol arapela pasifik kantri tu. Na sapos yumi no nap long imruvim ol helt sevis bilong yumi, planti ol mama na ol pikinini bilong yumi bai ken lusim laip bilong ol yet”.

Em i tok ol helt sevis bai strong sapos ol midia lain i ken kamapim planti ol pablisiti long dispela ol hevi.

PNG Midia Kaunsel Presiden Joe Kanakane na Eksekutiv Dairekta Nimo Kama i bin stap tu long opisiet long dispela lonsing.



LUKLUK NA HARIM: Ol manmeri i bin pulap kapsait long Tavor Kalsarel So.

‘Noken larim pasin i senisim kalsa bilong yumi’ – Simet

DAIREKTA bilong Nesenel Kalsarel Komisin, Dokta Jacob Simet, i tokim ol pipel long Kimbe husat i bin kamap long lukim Wes Nu Briten Tavor so, olsem ol i noken larim pasin i senisim kalsa bilong ol.

“Yumi noken lus tingting long tru tru strong bilong kalsa bilong yumi. Ol senis i kamap long ples we i no luksave long kalsa bilong yumi i wok senisim planti samting long kalsa long ol ples bilong yumi, na planti manmeri i lus tingting long we bilong bilas na danis bihainim tru tru singsing bilong ples na pairap bilong kundu na garamut. Ol nupela kain tingting i wok long senisim luksave yumi gat long kalsa,” em i tok.

Dokta Simet i tok Wes Nu Briteni gat bikipela sans long kisim luksave bilong ol kalsarel grup bilong en we ol i ken karim kalsa bilong ol i go aut long ol arapela kantri tu.

Moa long 30 tumbuna singsing grup i kam long 11-pela lokol level gavman eria long provins i bin kamap long makam Tavor kalsarel so.

Provinsel Administreta Steven Raphael i tok luksave long Gavana Peter Humphreys long givim K200,000 long kamapim Tavor kalsarel so.

Long mekim dispela so i kamap bikipela moa long 2011, Mista Humphreys i tok long givim K50,000 long kamap bilong 2011 Tavor kalsarel so.



Helpim go long Gasmata

DISPELA wik i lukim ol bilding saplai, na helpim samting bilong go long ol lain pipel bilong Gasmata eria husat i bin bungim hevi bilong graun guria. Ol dispela samting em Memba bilong Kandrian Glosta, Tony Puana i skelim K40,000 i go long Agmark Kampani long Kimbe long givim. Planti famili bilong Gasmata i nogat gutpela haus, na ol Provinsel Disasta Opisa long Kimbe i pinisim ol ripot bilong ol na nau memba i givim sapot bilong ol pipel bilong em.

Long dispela wik tu, bai ol kar i karim ol saplai bai ron i go olsem na lusim long Gasmata.

Tenkyu tru Air Niugini

**The evolution of PNG
Road Safety Senis kamap
long PNG Rot Sefti**

Mi bin amamas long tokaut las wik olsem ol i surikim prais bilong 15-pela laki wina bilong dispela nupela MVIL PMB draiva kompetisen we bai kamap long dro long Septemba 1. Nau mi laik tokaut long sampela samting we i mekim na mipela surikim taim bilong dispela naispela sans long laip bilong dispela ol laki wina.

Bikpela tenkyu tru long gutpela sapot i go long MVIL 'Rot Sefti: Emi no Wanpela Pilai' kempein. Mi ken tokaut stret olsem Air Niugini nau i kamap olsem wanpela sponsa na bai bringim 22-pela lain grup, namel long ole m 15-pela ol draiva husat i win long go stap sampela moa de pas-taim long NRL Gren Fainol pilai. Ol dispela lain bai kamap long Sidni long Septemba 30 na kambek long Oktoba 2 bihain long ol lukim NRL Gren Fainol long ai bilong ol stret.

Em gutpela tru long dispela bikpela taim long lukim wanpela strongpela na bikpela kampani bilong yumi PNG, Air Niugini long givim risoses bilong en na tu givim sans long ol dispela lain husat pastaim ting olsem ol bai i no inap flai long balus i go ovasis. Air Niugini i gat gutpela tingting long helpim komyuniti taim e mi givim gutpela sapot igo long 15-pela gras ruts kantri man bilong yumi. Wantaim dispela gutpela sapot mipela i ken nau mekim ol dispela draiva long kamap long Fonde long stat wantaim ol narapela lain long TV long NRL Footy Show. Mipela bilip olsem ol lain long Footy Show bai kisim piksa bilong ol long TV na soim na ol lain femili na wantok bilong ol long PNG na tu ol narapela lain long ovasis i ken lukim. Ol bai kamap olsem ol sta lain stret long TV.

Wanpela de bihain long Footy

Wantaim

Dr John Mua

Dr John Mua em Menesing Dairekta bilong Motor Vehicle Insurance Limited, husat i kamapim "Rot Sefti: Emi no wanpela Pilai" pablik aweanes kempein.

Show, na sapos wanpela tim bilong Sidni i go insait long fainol, ol dispela lain 15-pela draiva bai i gat sans long go lukim dispela tim i mekim trening bilong ol long Fraide nait. Ol bai ron long wanpela bas wantaim draiva long soim ol ples long Sidni Siti na tu stap olsem ol ges bilong Cronulla Sharks pilaia Paul Aiton long raun bilong ol. Neville Costigan bai raun wantaim ol dispela draiva tu sapot tim bilong em St GeorgeDragons i no go long Gren Fainol. Dispela mipela i no tingting planti tumas, na mipela pasim gut lak bilong mipela long Neville na Dragons insait long ol fainol pilai.

Em gutpela taim nau long ol dispela narapela draiva husat i stap yet long resis long mekim gutpela pasin na draiv gut long rot long PNG. Sapos ol ripot mipela i lukim i kamaut long Pot Mosbi eria i ken soim olsem gutpela, mipela i lukim olsem sans bilong ol draiva long win em gutpela.

Mi ken givim ripot nau olsem i gat nau 25-pela draiva insait long Mosbi eria husat i gat sans yet long go long Sidni. Dispela namba i kamaut bihain long planti handret lain i rejista, tasol mi guria stet olsem planti ol draiva i wok long bagarapim gutpela sans bilong ol long win taim kompetisen i wok long kam long arere bilong en.



SPITIM KAR em ino wanpela PILAI



**NOKEN
SPITIM KAR**

**STAP WANTAIM GEM PLEN
BILONG YU NA SPIT LIMIT**

Spitim kar em wanpela long ol bikpela asua tru we i save kamapim birua long rot insait long PNG NA save lukim planti pipel i dai. Sapos yu spitim kar yu bai gat bikpela sans long bungim birua na kilim yu yet o narapela lain. Em taim nau long tingting strong long ROT SEFTI – em ino wanpela PILAI



**60
km/h**

**Insait
long taun
o sain i soim**

**75
km/h**

**Long ol
Haiwe
o sain i soim**

**SAPOS OL I HOLIMPASIM
YU BAI YU PEIM MANI
O GO LONG KALABUS**

**ROT SEFTI
em ino wanpela
PILAI**

A road safety
initiative by



Wara Bumbu

Bustin Anzu i raitim

Wanpela man i waswas long Wara Bumbu taim wara i klin na i nogat pipia samting long wara.

"PAPA, mi laikim dispela wara, em nais olgeta. Em mekim mi kol nogut tru. Maski em deti long ren taim tasol nau em klin olgeta," liklik 6 yia Grace Diane Kupu Anzu i mekim dispela nek long mi tupela Sarere i go pinis taim mipela famili i go long wasim kar long Wara Bumbu.

Em i bungim olgeta liklik ston na wesan na wokim ol liklik haus bilong em long wesan na mekim sampela tok tok bilong em yet.

Em i stap liklik na bihain ron i go insait long wara na waswas na pilai long wara, kam autsait slip long wesan na mekim sampela song long tok ples Hagen.

Mama bilong em sindaun long sait wantaim bebi bilong em na lukluk long sampela liklik mangi pilai long wara taim papa bilong ol, putim huk long wara long painim pis.

I go daun liklik, wanpela man i waswas na sampela mama i wasim samting na wasim ol liklik pikinini bilong ol.

Long baksait, wanpela masin bilong Boinamo Enterprise i laik kisim wesan na putim igo antap long ol bikpela kar bilong ol long karim igo na miksim na kamapim simen bilong wokim haus. Masin i wok long stretim ol ston na wesan i stap.

Long sait bilong en, wanpela liklik wara i ron na tupela PMB ka i kam stap na ol bas draiva na bos kru i go aut na wasim kar bilong ol na redi long kisim pasindia long neks de.

I go daun moa yet, Bumbu Bris i stap na ol manmeri i wokabaut i go kam na ol kar tu i ron antap long dispela bris.

Dispela em Wara Bumbu insait long Lae siti. Dispela em wanpela bikpela wara tasol i save ran namel long siti i go bungim nambis long Voco Point.

Taim nating, yu lukim dispela wara, bai yu ting em i nogat strong na ron isi tru olsem em nogat strong.

Wara bai ron klin stret na nogat deti o hap pipia i pas long em na nogat rabis tu. Planti ol ston long sait bilong wara bai stap ples klia na yu ting em wara nating i ron.

Ol lain slip arere long wara long Wes na Is Taraka, Nawaec Blok, Kamkumung Gravel, Talair Kompaun, Asu Blok, Butibam na Bumbu Setelmen long Saina Taun save kisim gutpela sevis bilong wara long dispela hap.

Ol i no save baim, em fri ov sas.

Ol pikinini bai go pilai na waswas long moning i go apinun, ol mama bai karim ol doti samting igo wasim, ol yangpela bai go painim paia wut na pulim pis na ol man i gat kar bai go wasim.

Wantaim hevi bilong wara insait long siti, planti husat i slip arere long wara i save dring tu. Wara Bumbu i save helpim ol gut tru.

Olsem ol i tok wara em laip,



Bumbu tait: Wara Bumbu i tait na daunim sampela banana long sait bilong wara na klostu daunim wanpela haus tu. Wara i ron aninit bilong haus. Dispela haus nau i sanap yet na ino bin pundaun taim wara tait i go.

em i tru.

Tasol taim wara i tait, em save soim tru kala bilong em. Nogat wanpela samting i ken pasim em. Em save ron wantaim bikpela strong bilong em.

Taim bikpela ren i pundaun, dispela taim em i save kamap narapela kain olgeta.

Strong bilong em olsem nogat wanpela man o kar i ken stopim.

Ol dispela ston we stap ples klia em bai daunim igo antap tru na ol ples, haus na gaten long sait bilong wara tu em i ken daunim.

Dispela taim em i save karim ol pipia na ol hap diwai na planti ol narapela samting we em i ken painim long sait bilong wara, igo wantaim em long solwara.

Long dispela taim, yu ken luksave long strong bilong Wara Bumbu, insait long Lae siti.

I no Wara Bumbu tasol i gat dispela kain strong, nogat. Olgeta wara bilong nambis ples em wankain olsem.

Long taim nating, ol bai soim olsem ol i nogat strong. Tasol long taim bilong ren, ol i save soim tru kala bilong ol olsem wara.

Taim em i tait, em i save kamapim planti hevi long Lae siti. Planti i save pret olsem em bai go antap long ol big rot na daunim ol haus na rot insait long siti.

Dispela em long wanem, long 1983, bikpela ren i mekim na wara i tait na daunim ol ples long sait na kisim haus bilong planti manmeri stret.

Morobe Provinsel Gavman i luksave long dispela hevi na painim narapela hap long ol i stap. Ol dispela lain husat i kisim bagarap na lusim ol samting bilong ol long hai wara, i bin go na kisim blok long Tensiti, baksait tasol long Yunivesiti bilong Teknologi bilong Papua Niugini.

Planti long ol dispela lain i no ting olsem Wara Bumbu bai kam na kisim ol. Olsem na planti manmeri i bin lusim ol samting bilong ol long dispela taim.

Long dispela hevi, samting olsem 27 krismas i go pinis, ol manmeri husat i save slip o stap long sait bilong Wara Bumbu i save kisim was olgeta taim, long taim bilong ren.

Ol i no save slip taim em i ren long wanem, ol save pret nogut wara i tait na i go antap na kisim ol haus na gaten samting. Ol i save tingting long

wanem samting i bin kamap long 1983, we sampela i lusim laip bilong ol.

Long sampela taim igo pinis long bikpela ren, klostu em i rausim Bumbu bris, klostu long Kamkumung. Tasol em i bin rausim o daunim ol haus lain long sait bilong Kasowari Rot (Casowary Road).

Gavman i sanapim traipela ol ain long blokim wara long noken go antap long sait bilong ples klostu long Bumbu Bris long Kamkumung na dispela i save banisim ples liklik long taim bilong bikpela ren.

Wan wan taim em i ren nogut tru, Wara Bumbu i save tait na go antap long ol ples arere na daunim ol gaten na haus tu.

Wara Bumbu i gat tripela hap long brukim. Antap long rot i go long Wes Taraka, Kamkumung na bihain long Saina Taun.

Planti ol ples arere long wara na ol risev graun em ol i bin larim i stap, nogut wara i tait na kisim ol pipel gen. Planti long bipo i bin witnesim wanem samting kamap na ol i larim.

Tasol, taim senis na wok developmen i kamap insait long Lae siti na kantri, planti manmeri i go i kam, ples tu i sot long ol manmeri i stap. Na ol i wok long kamapim setelmen long laik bilong ol yet.

Na dispela i lukim ol dispela risev graun na ples we i bin stap nating, em ol i wokim haus long laik bilong ol na kamapim setelmen.

Nau askim i stap olsem sapos ren i kam na Wara Bumbu i tait na kisim ol dispela ples wantaim ol manmeri, haus na gaten we ol i larim i stap nating long en, husat bai kisim hevi o kamap papa long dispela na helpim ol sapos ol i kisim sampela bagarap.

Provinsel gavman bai i tok em no papa long dispela na em i wasim han pinis long 1983 yet taim namba wan bagarap i bin kisim ol.

Na kain olsem bai husait bai papa long wanem, laip i lus na long kamapim ol ples nogut kamap gutpela, i gat sampela lain i save wokim na wanpela mas kamap papa long dispela.

Ol Poto: Bustin Anzu

6 yia Grace Diane Kupu Anzu i pilai long wara.

Mama i tro-moi huk i go daun long painim pis taim pikinini i lukluk i stap.

Wasim Ka: Tupela PMV bas i stop long sait na wasim ka i stap.

Ol pikinini i pilai long Wara Bumbu

TORO



BIABIA



KANAGE



TOKWIN

Bikpela 'sem ya' PNG

Em rabis pipia pasin tru long harim olsem ol stilman i digim matmat bilong Se Brian Bell long 9-Mail semeteri long Mosbi. Dis-pela i soim tru olsem sampela liklik lain long PNG i gat bikpela sik nogut i stap long kuru bilong ol. Ol dispela liklik lain ya i bagara-pim tru nem bilong yumi. Ol ova-sis lain bai semim tru PNG.

Lae siti bagarap long pasin nogut

Namba tu siti bilong PNG i no olsem siti. Em pulap tru long ol stilman na ol doti man bilong

setelmen husat i laik long stap na stil long ol man long strit. Ol lida bilong Morobe, husat save opim maus long toktok tumas mas stretim hevi long Lae bikos em bikpela siti bilong ol na em bagarap tru long raskol pasin. Moabeta rausim ol setelmen long Stet na kastom graun.

Madang manmeri guria long lukim pes bilong Kapris

Ol manmeri long Madang i guria stret long lukim pes bilong dispela biknem stilman ya William Nanua Kapris na bung bung arere long Kot Haus. Sampela i go stap long hap long moning taim yet.

Man, ating ol laik Kapris bai givim wanem samting tru long ol.

Matmat stilman painim mani o gol?

Ating wanem kain tingting tru kisim ol dispela stilman long digim matmat bilong Se Brian Bell. Ating ol i ting olsem bai ol i painim gol, silva o mani o wanem samting? Tru tumas ol dispela lain i no save prêr long tewel o spirit bilong dai man. Ating sampela bilong ol mas brata o kandre bilong tewel o spirit nogut Satan ya. Paia bilong Hell i wetim ol i stap.

Tokwin Tasol...

B	A	L	A	N	D	G	Y	P	G	T	U	F	K	L	H	K
F	E	R	S	D	I	V	I	S	E	N	N	U	U	O	J	O
S	W	I	L	E	F	K	E	N	M	C	B	L	T	S	S	N
G	O	L	I	E	E	I	Z	U	L	M	I	B	E	A	I	A
I	I	P	G	S	N	E	L	K	W	G	N	E	K	I	H	K
R	N	J	G	U	S	E	E	A	D	A	O	K	H	F	I	I
I	R	E	O	I	E	S	T	R	A	I	K	A	A	D	P	K
A	F	I	L	D	A	S	G	E	N	P	W	M	G	W	L	N
T	R	A	S	N	A	B	A	O	F	A	U	L	N	A	P	O
I	U	O	I	S	N	D	P	O	L	A	N	V	I	T	I	H
A	T	W	U	S	L	U	S	N	I	K	S	B	W	J	S	E
S	S	A	L	I	M	B	A	L	T	T	I	B	A	L	A	T
F	I	A	F	N	Y	E	U	A	O	R	L	P	I	U	I	I
O	U	D	E	F	R	I	K	I	K	I	I	A	A	F	M	M
A	I	S	L	E	S	T	S	I	N	T	T	T	N	P	I	B
M	I	S	R	E	F	E	R	I	V	S	K	I	A	E	R	A
S	E	N	I	S	I	M	P	I	L	A	I	A	D	A	P	L

Painim ol dispela soka toktok:

BAL	DIFENS	DIVISEN	FAUL	FIL
FILDA	FRI KIK	FOWAT	GEM	FULBER
GOL	GOLI	GOLKIPA	HETIM BAL	KONA KIK
KOSA	LIG	MIDFILDA	OFSAIT	PRIMAISP
PENALTI	REFERI	SENISIM PILAIA	SALIM BAL	STAIL
STRAIKA	SIL	SISEN	WINGA	WINA

7	6			5		2		3
	3	9	6	1	8	5		
	5				7			
5	9							2
	8			3				5
	4							1 7
			4					3
		4	2	7	3	9	6	
6		3		8			4	1

8	7	9	4	5	1	3	2	6
5	6	4	2	3	7	8	9	1
2	3	1	6	8	9	5	7	4
7	8	2	9	1	4	6	5	3
4	5	6	3	2	8	9	1	7
1	9	3	5	7	6	4	8	2
3	2	8	7	6	5	1	4	9
6	4	5	1	9	2	7	3	8
9	1	7	8	4	3	2	6	5

Ansa bilong las wik Sudoku

Ansa bilong las wik Pasol

J	A	P	A	N	D	G	Y	P	O	T	U	S	A	L	H	K
F	E	R	S	A	S	K	O	T	L	A	N	N	U	I	J	U
S	W	I	D	E	N	K	E	N	X	C	B	N	T	S	W	K
S	A	I	R	E	I	G	Z	U	L	M	I	B	E	A	I	A
I	E	P	F	S	A	B	E	V	K	W	J	N	M	K	I	H
R	N	J	K	U	J	E	E	A	D	A	O	O	I	M	I	L
I	R	E	W	I	E	X	S	L	E	W	R	D	O	A	P	A
A	M	G	L	O	M	S	P	E	N	P	W	M	A	K	L	N
E	R	A	S	I	A	B	K	D	F	U	E	C	R	N	P	Q
M	U	O	I	S	N	H	P	O	L	A	N	V	V	O	N	N
A	T	P	U	S	I	U	S	N	P	H	S	B	X	J	A	A
L	S	A	I	P	R	A	S	I	T	K	U	B	A	S	L	L
A	I	A	N	E	Y	E	U	A	O	R	Y	X	M	U	I	E
Y	U	W	L	I	B	I	A	D	K	I	I	I	E	F	S	S
A	P	A	L	E	S	T	A	I	M	T	S	T	R	P	U	I
S	C	A	L	E	K	O	S	L	O	V	A	R	I	A	L	N
N	A	I	J	I	R	I	A	Y	E	A	N	A	D	A	J	S

EMTV Television Guide

Justin Timberlake, LL Cool J. 10.30PM G HILLSONG 11.00PM G NATIONAL EMTV NEWS REPLAY 11.30PM Australia Network	4.57PM G EMTV TOK SAVE 5.00PM G HOT SOURCE 5.29PM G EMTV NEWS UPDATE 5.30PM G WHO WANTS TO BE A MILLIONAIRE - HOT SEAT 5.55PM CRIME STOPPERS 6.00PM G NATIONAL EMTV NEWS 6.30PM G A CURRENT AFFAIR 7.00PM G TOK PIKSA 7.27PM EMTV TOK SAVE 7.30PM PG THE FARMER WANTS A WIFE (NEW SERIES) 8.30PM G KINGAL MINISTRIES 9.00PM G SUPER LEAGUE 9.00PM G CASTLEFORD v LEEDS 11.00PM G NATIONAL EMTV NEWS REPLAY 11.30PM Australia Network	9.00AM EMTV PRIME TIME LINEUP CLASSROOM BROADCAST 9.20am - Grade 7 Mathematics 10.10am - Grade 7 Science 10.10am - Grade 8 Mathematics 11.00am - Grade 8 Mathematics 11.50am - Grade 8 Science 12.40pm - Grade 6 Mathematics 1.30pm - Grade 6 Science 2.30PM - DEPI Training KIDS KONA 3.00PM G MAGICAL TALES 3.30PM G HI-5 4.00PM G THE PYRAMID 4.30PM G THE SHAK 4.57PM G EMTV TOK SAVE 5.00PM G HOT SOURCE 5.29PM G EMTV NEWS UPDATE 5.30PM G WHO WANTS TO BE A MILLIONAIRE - HOT SEAT 6.00PM G NATIONAL EMTV NEWS 6.30PM G A CURRENT AFFAIR 7.00PM G HAUS & HOME 7.57PM EMTV TOK SAVE with Kevani Mado 8.00PM PG BROTHERS & SISTERS	9.00PM G SUPER LEAGUE (teams: tba) 11.00PM G EMTV NEWS REPLAY 11.30PM AUSTRALIA NETWORK TRINDE, 18 OGAS 2010 4.59AM STATION OPEN 5.00AM G JOYCE MEYER Religious program 5.30AM G TODAY 9.00AM EMTV PRIME TIME LINEUP CLASSROOM BROADCAST 9.20am - Grade 7 Mathematics 10.10am - Grade 7 Science 11.00am - Grade 8 Mathematics 11.50am - Grade 8 Science 12.40pm - Grade 6 Mathematics 1.30pm - Grade 6 Science 2.30PM - DEPI Training KIDS KONA 3.00PM G MAGICAL TALES 3.30PM G HI-5 4.00PM G THE PYRAMID 4.30PM G THE SHAK	4.57PM G EMTV TOK SAVE 5.00PM G HOT SOURCE 5.29PM G EMTV NEWS UPDATE 5.30PM G WHO WANTS TO BE A MILLIONAIRE - HOT SEAT 5.55PM CRIME STOPPERS 6.00PM G NATIONAL EMTV NEWS 6.30PM G A CURRENT AFFAIR 7.00PM PG THE WORLD AROUND US 7.57PM EMTV TOK SAVE 8.00PM M 24 9.00PM M WEDNESDAY NIGHT MOVIE: : GIRL WITH A PEARL EARRING (2003) Biography/Drama/Romance - A young peasant maid working in the house of painter Johannes Vermeer becomes his talented assistant and the model for one of his most famous works. Stars: Colin Firth and Scarlett Johansson. 11.00PM G NATIONAL EMTV NEWS REPLAY 11.30PM AUSTRALIA NETWORK
---	--	--	---	---

Raun wantaim Kanage olgeta wik

Tais Wara

Kanage em wanpela ekting bodi bilong hap long Banz ol i kolim ples Kalanga. Nik nem bilong em Tais Wara. Em save draivim lasmangi daina long Banz-Kimil rot. Wanpela taim buk i kamap stret long lek mit bilong em na wara nogut i kamaut. Dispela taim em i bin putim wanpela blakpela spotwe bilong Susana na draiv i go long Banz taun. Long hap yet em kamaut long kisim buai na wokabaut krangi liklik. Man ol meri long KNK i lap na tok, "Porok o draiva?" Kanage strongim sait na tok "Em tais wara ya, noken tok."

MDH
Banz

"There..."

Wanpela taim Kanage wantaim gelpren bilong em go danis long ples Gasmata long Arowe. Musik bilong Gasmata Vaibresen mekim ples paia na Kanage wantaim gelpren bilong em i



mekimsave. Tupela go long namel na stat long disko. I no longtaim na wanpela man holim as bilong gelpren bilong Kanage na gelpren bilong Kanage i singaut. Kanage belhat na bikmaus long Tok Inglis, "Atus Rokat! The trabel is kamap there! We is the Kanai sikiriti there?" Ol lain stap klostu harim na ol lap long Kanage. Kanage tok gen, "Hey don't lap there! I don't do the form four there. I cut the banana there, the tisa the rausim mi there!"

Bikpela Uncle
Arowe

Tapiok

Wanpela de Kanage hangre nogut tru. Em go long gaden na rausim olgeta tapiok kam long haus. Long wankain taim meri

bilong em i boilim hot wara stap long haus kuk. Kanage putim ol tapiok long haus na go slip stap. Meri singautim Kanage taim wara boil, "Yu slip tumas long wanem? Rausim skin bilong tapiok bilong yu na karim kam na mi stretim." Oloman! Kanage slip dai na em kirap nogut taim meri bilong em singaut long em. Kanage harim toktok bilong misis bilong em na em tingting krangi na bekim, "Oloman! Traipela san na yu laik sigarapim tapiok bilong mi. Yu wet, nait bai yu ken stretim."

Kroc Apo
Goroka

Ol skwat!

Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email:
atolire@wantok.com.pg

Edukesen laip bilong mi

Dia Laiplain,
MI pinisim Gred 8 bilong mi na mi bin bilip olsem mi inap long go het wantaim Gred 9 long wanpela hai skul insait long provins.

Taim mi kisim setifiket bilong mi, mi lukim olsem mi no kisim ol gutpela mak long helpim mi go het wantaim Gred 9 bilong mi.

Mi no pilim gut tumas bikos edukesen i laip bilong mi na mi no laikim ol arapela long lukim mi olsem wanpela husat i pinis long skul na stap nating long haus. Bai mi mekim wanem long go het wantaim edukesen bilong mi?

Gred 8 drop-aut

Dia Pren,
Mipela pilim sore bikos yu bin gat bilip olsem yu inap long painim spes long go het wantaim Gred 9 bilong yu insait wanpela hai skul long provins yu stap long en.

Namba wan samting mipela askim yu long traim long luksave em dispela em ol risal yu kisim long fainol tes bilong yu.

Mipela strongim yu long noken pilim bel hat wantaim yu yet o agensim ol narapela bikos long dispela ol risal. Traim long go bek long ples bilong yu na kisim malolo.

Em bai gutpela sapos yu stap longwe long ol pren na wan krismas grup bilong yu long sampela taim. Taim yu stap yu yet, em bai gutpela yu sindaun na tingim bek olgeta yia yu bin skul long en.

I moa gut yu askim yu yet wanem samting i mekim na yu no kisim ol gut-



pela mak long Gred 8 fainol tes bilong yu. Em bikos yu no yusim inap taim long wokim stadi o wanem?

Yu lusim moa taim wantaim ol pren bilong yu we i banisim yu long stadi gut? Papamama bilong yu i askim yu long wokim planti samting long ol, o yu yet i save les long stadi?

Taim yu painim aut wanem samting i mekim yu no kisim gutpela mak, em bai gutpela sapos yu mekim strongpela disisen long putim laip bilong yu bek long rait rot na go het wantaim skul bilong yu. Mipela laik tokim yu olsem, taim yu stap laip yet, edukesen i no save pinis.

Em gutpela long stap amamas na long gat strongpela tingting long kamap man o meri yu laik kamap long taim bihain.

Mipela strongim yu long go het na strongim tingting bilong yu long wok hat long laip yu laikim.

Yumi stap long wol i pulap long planti salens na yumi bilip sapos yumi luksave long wanem samting i rait na yu gat strongpela tingting long wanem samting yu wokim, yu bai painim win stori.

Planti skul o edukesen institut i nau stap insait long PNG na mipela ting yu mas noken wet long ol samting long kamap. Yu mas go aut na painim ol dispela sans long go het long skul.

Yu ken sindaun wantaim papamama

bilong yu na tokim ol long laik bilong yu long go het wantaim edukesen bilong yu. Mipela i strongim yu long noken ting olsem ol samting i kam isi na tingim papamama bai mekim olgeta samting long givim yu edukesen. Yu mas gat strongpela tingting long wokim stadi bilong yu yet.

Mipela i bilip papamama bilong yu i laikim yu long mekim gut long edukesen bilong yu na yu ken kisim gutpela wok. Em bai gutpela sapos yu ken givim bek samting long papamama bilong yu taim ol nidim helpim. Mipela i laik lusim dispela hap tok wantaim yu: "Ol lain husat i tingting liklik bai lukluk long ol situesen na bai oltaim lukim ol banis. Tasol ol lain husat i tingting bikpela bai oltaim lukim ol sans, maski long ol taim we i gat hevi."

Mipela i lukim yu olsem wanpela yangpela husat i pulap long laip na i gat strongpela tingting long go het na painim wanem samting yu mas painim yu yet.

Luksave na laikim tru God na bilip olsem Em bai givim gutpela stia long yu.

Laiplain.

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori bilong yu i kmap long niuspepa.

Laiplain



NEM: Emmanuel Tifa

KRISMAS: 17 (man)

ADRES: Bema High School, Private Mail Bag, Lae, Morobe province

SAVE LAIKIM: Harim musik, pilai soka, stori, go lotu na ritim buk.

NEM: Andrew Banakato

KRISMAS: 17 (Man)

ADRES: Bema High School, Private Mail Bag, Lae, Morobe province

SAVE LAIKIM: Pilai ragbi, stori, mekim pani, ritim buk, raitim pas, pilai gita, harim musik na go lotu.

NEM: John Jons

KRISMAS: 18 (man)

ADRES: Bema High School, Private Mail Bag, Lae, Morobe province

SAVE LAIKIM: Pilai musik, soka, volibol, serim ol samting, go lotu na pilai spot.

NEM: Thomas Kuni

KRISMAS: 18 (man)

ADRES: Bema High School, Private Mail Bag, Lae, Morobe province

SAVE LAIKIM: Pilai spot, pilai musik, harim musik na go lotu

NEM: Peter Moran

KRISMAS: 24 (man)

ADRES: P.O Box 541, Kimbe, West New Britain Province.

SAVE LAIKIM: Pilai soka, volibol, na basketbol, lukim TV, danis na wokim gaden, ritim buk na mekim pani

NEM: Irami Peter

KRISMAS: 19 (Man)

ADRES: Mora Mora Technical School, PO Box 23, Hoskins, West New Britain Province.

SAVE LAIKIM: Pilai spot, raitim pas, mekim pren na harim musik

NEM: Kate Peter

KRISMAS: 20 (meri)

ADRES: Mora Mora Technical School, PO Box 23, Hoskins, West New Britain Province.

SAVE LAIKIM: Harim musik, pilai gita, mekim pani na raitim pas na go lotu

NEM: Rita Ande

KRISMAS: 19 (meri)

ADRES: Integrated School, P.O Box 907, Kimbe, West New Britain Province.

SAVE LAIKIM: Kukim kaikai, pilai spot, harim musik, raitim pas, mekim pren, na go skul

NEM: Lowi Imias

KRISMAS: 22 (man)

ADRES: C/- P.O Box 96, Wau, Morobe Province

SAVE LAIKIM: Mekim pren, mekim pani, stori na raitim pas

NEM: George Luguni

KRISMAS: 22 (man)

ADRES: P.O Box 33, Mendi, Southern Highlands Province

SAVE LAIKIM: Pilai ragbi, basketbol, soka na voli-bol, stori, pilai gita na go lotu



OL BIKMAN BUNG: ANZ Grup CEO Michael Smith (lephan) na PNG na Pasifik Notwes CEO, Vishnu Mohan i bungim na kisim poto wantaim Praitim Minsita Se Michael Somare long bikpela bung kaikai las wik Fonde.

Bikpela bosman bilong ANZ tromoi lek long PNG na Pasifik

...Somare laikim moa luksave long maikro benk sevis

SIF Eksekyutiv Opisa bilong ANZ Benk, Mike Smith i makim 100 yia bilong benk long Papua Niugini long wanpela bikpela selebrense kaikai long Pot Mosbi wantaim ol bikpela kastoma na ges olsem Praitim Minista Se Michael Somare las wik Fonde.

Raun bilong Mista Smith long PNG i kam aninit long wanpela fopela de raun wantaim Sif Eksekyutiv Opisa bilong ANZ Pasifik Michael Rowland.

"Mipela opim namba wan brens bilong mipela long PNG 100 yia i go pinis taim nem bilong mipela i bin Union Bank of Australia. Bihain na i kam inap nau, mipela i kamap wanpela ful riteil na komesal benk we i save givim gupela benking sevis long kantri, na tu i go long olgeta ol bus na rural ples.

"Mipela i mekim bikpela wok tu long helpim na givim mani sevis long ol bikpela infrastraksa projek olsem US\$400 milian

mipela i givim bilong LNG projek na benking sevis i go long ol bikpela kontrakta bilong LNG projek," Mista Smith i tok.

Praitim Minista Somare i tok planti ol bikpela developmen we bai kamap long kantri bihainim kamap bilong LNG projek, bai sanap antap long gupela wok na sevis i kam long ol investa olsem ANZ Benk.

Em i tok tu olsem ANZ i mas luksave tu long wok maikro benk bai em i ken karim ol sevis bilong en i go insait long ol bus ples bilong kantri.

"Mi laik askim ANZ long helpim ol ples manmeri long banisim gut na groim ol sevis bilong ol.

Mi save olsem sevis yu givim long ol rurel pipel bai helpim ol manmeri stret. Em bai bikpela salens bilong yu, tasol mi bilip olsem em bai kamap gut bilong yupela long benk tu," Se Michael i tok.

Polis tokim manmeri long lukaut long LNG masin ron long Okuk Haiwe

James Kila i raitim

BIKPELA sip-bris o wof long Lae, Morobe provins i wok long lukim planti ol kain kain bikpela masin i kam long ovasis long redi long muv i go long Sauten Hailans provins long wok long likwifait netserel ges (LNG) projek.

Ripot Wantok Niuspepa i kisim i tok olsem ol dispela bikpela masin long wok long LNG i kam long Dubai long Yunaited Arab Emirets na stap long Lae long bihain ol bai karim i go long Komo long Sauten Hailans provins. Sampela eria long olpela Lae ples-balus em PNG LNG lain i yusim long putim ol bikpela masin bilong mekim wok.

Intenesenel kampani DHL i kisim kontrak long redim ol pasin ya long Lae na stretim trenspot long bringim ol i go long Komo ges fil.

Las wik i go pinis na tu long dispela taim yet i Okuk Haiwe i bin bisi tru long lukim ol bikpela trak i karim ol masin bilong wok long LNG i muv bihainim rot stat long Lae i go abrusim Isten Hailans, Simbu, Westen Hailans na hap bilong Sauten Hailans na muv i go long Komo we ges projek wok i kamap long en.

Hailans Haiwe Patrol komanda, Sif Inspekta Dick Tambua i askim ol manmeri long ol viles na haus-lain arere long Okuk Haiwe long lukaut gut taim ol bikpela trak i karim ol bikpela masin bilong LNG ron long rot.

Sif Inspekta Tambua i tok ol man bai guria long lukim ol bikpela trak bilong wok maining na ron ron i go sanap arere long rot, tasol ol i mas was gut.

Insait long fes kwata ripot bilong PNG LNG em Esso Hailans i redim, planti ol bikpela wok i muv igo insait long

wok stret long stat long mun Mas 2010 na nau yet ol i stap long stat bilong en yet insait long dispela 4-pela yia we wok konstraksin wok bai stap long en. Olsem na ol wok long luksave long envairomen na sosel na wok long sekim ol sistem na mekim ol ripot nau i kirap long stat bilong en tasol.

Papua Niugini Likwifait Netsurel Ges Projek ("Projek") em bikpela hap bilong wok developmen we i karamapim ges prodaksin we i kam long ol ges fil we i stap nau long Sauten Hailans na Westen Provins bilong Papua Niugini na ol prosesing fasiliti (Hides Ges Kondisining Plen (HGCP), paipain long graun na paipain long solwara long bringim ges igo long likwifaksin eria klostu long kapitol siti bilong PNG, Pot Mosbi. Long dispela hap bai i bringim Likwifait Netsurel Ges (LNG) i go long ol spesel tenka o sip ol i wok long karim i go long ol intanesinol kastoma, nambawan bai goaut long stat bilong yia 2014.

Esso Highlands Limited, wanpela han kampani bilong ExxonMobil Koporesin, i mekim wok konstraksin na bai wok long Projek makim ol lain ko-venesa - Oil Search Limited (OSL), Independent Pablik Bisnis Koporesin (Papua Niugini Gavman), Santos Limited, Nippon Oil Exploration, Mineral Resource Development Company (makim papagraun long Papua Niugini) na Petromin PNG Holdings Limited.

Fes kwata ripot bilong PNG LNG i tok tu olsem ol wok insait long projek bai kamap aninit long 6-pela Enjiniering, Prokumen na Konstaksin (EPC) kontrak we sampela lain husat i save gut na go pas long wok insait long indastri olsem kontraktas. Long nau yet wanpela EPC kontrakta (bilong Komo ples-balus) i statim wok bilong em long fil konstraksin pinis. Narapela ol EPC kontraktas i stap pinis long karimaut wok long plening hap bilong wok.

Long go wantaim ol EPC kontrak, konstraksin kontrak em ol i givim pinis long wanpela program bilong stretim ol rot na bris (infrastructure) pastaim long ol bikpela wok konstraksin long kamap insat long Galp provins na Sauten Hailans provins.

Wok long wokim rot na bris long antap long insait long dispela program i karamapim sivil wok insait long ol eria long Hides na Kutubu na tu long stretim na wokim ol nupela rot na rot na konstraksin bilong ples bilong trening na kem kontraksin, ekstensin na wok bilong stretim gen ol samting.

Narapela kontrak i karamapim ol stat wok long LNG Plent ples na ol eria klostu long en. Wok konstraksin i gohet pinis na nupela nupela dril rig long wokim dril ol i wokim pinis long drilim ol wel bilong projek.

Wok long wokim rot na bris long antap long insait long dispela program i karamapim sivil wok insait long ol eria long Hides na Kutubu na tu long stretim na wokim ol nupela rot na rot na konstraksin bilong ples bilong trening na kem kontraksin, ekstensin na wok bilong stretim gen ol samting.

Narapela kontrak i karamapim ol stat wok long LNG Plent ples na ol eria klostu long en. Wok konstraksin i gohet pinis na nupela nupela dril rig long wokim dril ol i wokim pinis long drilim ol wel bilong projek.

Senisim olpela Maining Ekt: Se Matiabe

Veronica Hatutasi i raitim

"PNG i mas senisim Maining Ekt we bai mekim ol papagraun i bosim olgeta samting antap long bus, graun na wara, na tu, aninit long ol".

Dispela em I tingting bilong Se Matiabe Yuwi, namba wan lida bilong Tari/Pori long Sauten Hailans na wanpela husat I bin stap long Nesenel Plening Komiti (NPC) we John Momis i go pas long na mekim ol Mama Lo bilong PNG.

Se Matiabe i tok gavman bilong Praitim Minista Se Michael Somare i mas senisim dispela lo nau bikos em i go agensim pasin na bilip bilong PNG long wanem lo i bilong ol pipel bilong Ingran, Australia na ol arapela bikpela kantri moa olsem.

Dispela em hap lo long Maining Ekt we PNG i bin kisim long Australia na Australia i kisim long Ingran na em go samting olsem: "Olgeta samting i stap

antap long graun, wara na solwara i bilong ol papagraun tasol ol samting i stap aninit long graun, wara na solwara em i bilong gavman."

Se Matiabe i tok CPC i bin toktok long dispela Ekt na i laik senisim 35 yia i go pinis, tasol planti etvaisa bilong PNG gavman long dispela taim bilong Australia, Ingran na ol narapela kantri i bin tok long noken senisim. Tasol 35 yia bihain PNG i kisim indipendens na planti senis i kamap long kantri na dispela Maining Lo i no sanap long helpim ol papagraun na pipel long PNG i stap yet na em i taim nau bilong senisim.

"Planti gavman minista long ol yia i go pinis in laik senisim dispela lo, tasol ol etvaisa bilong ausait i wok long opis bilong praim minister na ol narapela gavman dipatmen i stopim senis bilong dispela Maining Ekt.

"Mi pilim olsem ol etvaisa bilong narapela kantri i mas save olsem PNG i ples bilong planti mineral na olsem, ol i egensim senis long dispela Maining Ekt. Sapos ol i senisim Ekt ya, ol developa bai i no inap kisim planti benefit o ol gupela samting. Bikos long prët tingting bilong ol etvaisa bilong ol narapela kantri ma insait long 35 yia nau, PNG i no senisim dispela Maining Ekt.

"Olsem man i bin go insait long politiks 35 krismas i go pinis taim mi yangpela yet na nau mi lapun i gat planti bubu, nogat senis in kamap long dispela Maining Ekt. Tasol mi laikim nau taim gupela poroman bilong mi Se Michael i stap praim minista yet, em i mas senisim na stretim dispela Ekt bipo taim bilong em long gavman i pinis. Na ol papagraun i ken bosim olgeta samting ausait na insait long graun, wara na solwara," Se Matiabe i tok.



LNG TRAK: Wanpela bikpela semi-treila trak i karim ol bikpela masin ron long Okuk Haiwe i go long LNG projek long Sauten Hailans. Poto: James Kila

FSS program bilong CIC helpim ol rurel fama wantaim balus

...kopi bilong longwe ples go aut long maket

JAMES KILA i raitim

NAMBA bilong ol kopi beg insait long ol rurel ples long Isten Hailans na Simbu provins nau i wok long go kamap long maket bihain long gutpela wok kamap insait long Kopi Industri Koporesin Freit Suriti Skim (FSS).

FSS em wanpela program bilong CIC we i bin stat long 2003 bihain long wanpela smatpela man nem bilong em Bernard Goma i bin kamap wantapl gutpela tingting long wok klostu wantaim ol balus kampani long helpim CIC long bringim ol kopi rurel fama long longwe ples i go long maket na salim.

Dispela ofisa i kamap wantaim gutpela tingting tru na bel sore em i gat long ol rurel pipel i mekim em long kamap wantaim dispela tingting.

Mi yet mi bin wok klostu wantaim Mista Goma, husat save kolim mi brata na mipela i save i raun wantaim i go long ol rurel ples balus olsem Karimui na Negabo long Simbu na tu long Marawaka, Andakompi na Simbari long Isten Hailans long luk-save long hevi ol rurel pipel i bringim.

Long dispela taim mi bin wok long CIC olsem midia prodaksin ofisa na mipela i raun long glasim

ol hevi ol fama long bus ples i save bungim na tu kisim hamas kopi i ken orait long balus i ken go kisim na bringim i aut.

Mi ken tingim yet pastaim tru mipela i bin go long Karimui na mipela lukim turangu ol fama i kukim kopi beg bilong ol bikos ol kopi i longpela taim tru na bagarap.

Ol fama ya i kros tru na tok olsem ol i wetim balus tasol nogat mani long peim kos bilong balus olsem na ol kopi i go bagarap olsem na ol i kukim. Mi yet i mekim intaviu wantaim ol na bel sori bilong mi tui go long ol dispela pipel.

Mista Goma i bin mekim gutpela wok bung wantaim ol balus kampani olsem Misin Aviesin Felosip (MAF), Adventis Aviesin na tu SIL Aviesin long helpim ol rurel famas long bringim kopi bilong ol i aut long salim.

Bihain long 'Grin Revolusin' plen bilong gavman long 2002 i bin pundaun, planti tingting i bin kamap long wanem rot tru i ken kamap long bringim ol kopi insait long ol bus ples we nogat rot i go aut long maket.

Olsem na taim CIC i bin kamapim FSS long 2003 wantaim gutpela tingting bilong ol lain olsem ofisa pastaim em Mista Goma, planti ol rurel famas long bus ples nau i wok long bringim



KOPI KAGO: Ol rurel fama bilong Owena long Obura-Wonenara distrik long Isten Hailans i putim ol kopi beg i go insait long wanpela MAF balus long karim i go long Aiyura.

kopi bilong ol i goaut long salim long ol ples olsem Goroka na Kainantu.

CIC Freit Suriti ofisa long nau, Paul Gilma i tok olsem inap long 2009, FSS i bin helpim long karim ol kopi mak em volium o mak bilong en olsem 760,000 kilogram i

go aut. Dispela em olsem 15,000 drai beg drai o pasmen kopi. Ol dispela kopi i kamaut long ol ples-balus is tap long ol bus ples long tupela provins ya em Isten Hailans na Simbu.

Mista Gilma i tokaut olsem namba bilong kopi beg long dispela yia, taim ol i skelim wantaim bilong las yia i luk olsem namba bilong 2010 bai go antap.

Dispela em bihain long ol kopi beg em FSS i helpim long bringim i go aut long ol rurel ples balus olsem Negabo, Nomane, Karimui na Apa long Simbu provins na Maimafu, Andakombe, Simbari, Tuvau, Marawaka na Owena long Isten Hailans provins.

Long las yia olgeta namba mak em 52,663 kilogram i bin kamaut long ol dispela ples.

Tasol em i tok olsem bihain long planti aweanes bilong FSS long dispela yia i gat bilip olsem volium bai go antap olsem 90,000 kilogram long dispela yia.

Mista Gilma i tok olsem planti namba bilong kopi beg em balus i wok long bringim i kamaut long ol bus ples, tasol dispela namba CIC i putim aut em long rekot bilong ol yet insait long FSS program.

Bikpela as tingting bilong FSS em long givim gutpela kopi freit

program long promotim na sapotim na strongim na mekim kopi industri i go het gut long PNG.

Dispela i ken helpim tu long bringim gutpela mani long helpim sindaun bilong ol pipel na tu helpim gavana long ekomik na sosel polisi gol long rurel developmen.

Mista Gilma i tok ol fama long Morobe na Madang provins i mas go lukim CIC ofis long provins bilong ol long stap insait long dispela FSS program bikos sampela mani em CIC i putim pinis long tupela balus kampani em North Coast Aviesin na Island Airways long balus bilong ol i ken flai i go long ol rurel ples balus na bringim kopi i go aut.

Em i tokaut klia olsem freit skim i save peim kos bilong kago balus i karim igo long ol balus kampani, na bihain taim ol fama i salim kopi ol i ken peim freit kos na kisim sampela mani blong ol.

Dispela program i lukim kos i daunbilo liklik na fama tu i ken kisim gutpela mani.

Mista Gilma i tok olsem planti ol rurel fama i amamas tru long dispela sevis CIC i givim. Ol i tok olsem sevis CIC i givim em gutpela na prais i no antap olsem sampela ol praiyet bisnis lain na ol sampela wan wan man i wok long mekim na sasim bikpela mani.



MEKIM ISI TRU: Ol lain man i rausim ol kopi beg kamaut long MAF balus long ples-balus long Aiyura em SIL i ronim. Ol poto: Kopi Industri Koporesin (CIC)

KALAP: Tupela pilaia bilong Veupunama i resis wantaim gol suta (GS) bilong Esco long Mosbi netbol resis bilong ol las wik Sarere long Rita FLYnn kot. POTO: Andrew Molen.

BANIS: Wanpela Muruks fowet i painim hat long abrusim banis bilong ol Vipers long bemobile kap gem bilong ol long Mosbi las wik Sande. Muruks i bin win 11-10. POTO: Nicky Bernard.

APIM LEK: Wanpela Telikom pilaia i laik kikim bal i go long baksait bilong em na i tanim lek bilong em narapela kain. POTO: Andrew Molen.

MAN BILONG PENIM SIOT: Simon Tau wantaim meri bilong em, Hari Mores bai bisi gen. Tupela i save penim ol Fan Ran siot bilong ol kampani. POTO: Andrew Molen.

Port Moresby Rugby Football Union. Wik 18 dro

Sarere Ogas 14, 2010

Ovol 1

9.00am	U20	Chiefs	vs.	Harlequins
10.20am	B	Chiefs	vs.	Harlequins
11.40am	B	Royals	vs.	Hunters
1.00pm	A	Chiefs	vs.	Harlequins
2.30pm	A	Royals	vs.	Hunters
2.30pm	Primia	Kone	vs.	Wanderers

Ovol 2

9.00am	U20	Royals	vs.	Hunters
10.20am	U20	Kone	vs.	Wanderers
11.40am	B	Kone	vs.	Wanderers
1.00pm	A	Kone	vs.	Wanderers
4.00pm	Primia	Chiefs	vs.	Harlequins

Sande Ogas 15, 2010

Ovol 1

11.00am	U20	Defence	vs.	Brothers
12.20pm	B	Defence	vs.	Brothers
1.40pm	A	Defence	vs.	Brothers
3.10pm	Primia	Defence	vs.	Brothers

Ovol 2

11.00am	U20	Lasalians	vs.	University
12.20pm	B	Lasalians	vs.	University
1.40pm	A	Lasalians	vs.	University
3.10pm	Primia	Lasalians	vs.	University

Bai: Olgeta meri tim.
Laspela raun bilong sisen.

TOKSAVE: Salim ol spots dro bilong yu kam long Feks; 325 2579, e-mel; amolen@wantok.com.pg o kam lusim long Wantok Niuspepa opis long Central Waigani, NCD.



SPOTS DRO

RAUN 23

Ogas 13-16
2010

Gems bilong dispela wik



Broncos V^s Eels



Bulldogs V^s Raiders



Dragons V^s Eagles



Sharks V^s Roosters



Storm V^s Rabbitohs



Titans V^s Cowboys



Warriors V^s Knights



Tigers V^s Panthers

Raun 22 - Poin Leda

TIM	W	L	D	B	Pts
1 Dragons	14	6	0	2	32
2 Panthers	12	8	0	2	28
3 Roosters	12	8	0	2	28
4 Titans	12	8	0	2	28
5 Tigers	12	8	0	2	28
6 Sea Eagles	11	9	0	2	26
7 Broncos	11	9	0	2	26
8 Warriors	11	9	0	2	26
9 Rabbitohs	10	10	0	2	24
10 Knights	9	11	0	2	22
11 Raiders	9	11	0	2	22
12 Eels	9	11	0	2	22
13 Bulldogs	7	13	0	2	18
14 Cowboys	5	15	0	2	14
15 Sharks	5	15	0	2	14
16 Storm *	11	9	0	2	0

* Ol i rausim olgeta poin bilong Melbourne Storm bilong dispela sisen.

Inglis bai joinim Broncos

MELBOURNE Storm na Australia senta, Greg Inglis bai pilai wantaim Brisbane Broncos long 2011 NRL sisen.

Inglis i pasim tok long pilai tupela yia long kontrak bilong em wantaim ol Broncos.

Dispela bai lukim em i pilai long hap inap long 2012.

I bin gat bilip olsem Inglis bai stap bek wantaim ol Storm bihain long ol Gold Coast Titans na Broncos i no inap long bungim mani mak long baim em.

Tasol ol Broncos i yusim narapela hap mani bilong ol pilaia long putim i go antap long mani mak bilong kontrak bilong Inglis we i lukim ol i winim em long stap wantaim ol.

Titans i bin gat gutpela kontrak long givim Inglis tasol ol i no hariap long soim em na Broncos i winim ol.

I gat bilip tu olsem papa bilong Souths, Russell Crowe i bin laik kisim Inglis.

Melbourne i tok aut olsem ol bai lusim Inglis na fowet, Brett White i go bihain long dispela sisen.

Kosa Craig Bellamy i tok amamas long dispela tupela gutpela pilaia bilong em.

“Mipela bai no inap lustingting long wanem ol gutpela samting dispela ol pilaia i mekim long klap bipo ol i go.

“Mipela i wari long ol bai go na ol tu i wari,” em i tok.

Tingting bilong Inglis long go long Brisbane em long stap klostu long meri bilong em, Sally Robinson husat bai kisim wok long hap.

Dispela bai givim sans long Inglis long pilai wantaim Darren Lockyer long ol laspela gem bilong em insait long NRL.

Inglis i givim tok wanbel bilong em long Mande dispela wik olsem em bai pilai wantaim ol Broncos.



LUSIM PLES: Inglis bai lusim Melbourne we em i stat pilai na go long Brisbane wantaim meri bilong em.

Thurston no nap pinisim NRL dispela yia

JONATHAN Thurston bai no inap pilai gen long NRL dispela yia bihain long em i kisim bagarap long lek bilong em.

Tasol em i tok em bai orait long pilai bilong Australia long 4 Nations resis long pinis bilong dispela yia.

Thurston i kisim bagarap long skru bilong fut bilong em bihain long gem bilong ol agensim Brisbane Broncos las wik Fraide nait long Townsville.

Em i no bin pinisim dispela gem we ol Broncos i winim 34-26.


Thurston i harim pairap long lek bilong em na ol i ting em i brukim wanpela bun tasol ol wok painim aut i tok em i brukim masol tasol na em bai orait bipo long pinis bilong yia.

Ol Cowboys i toksave olsem em bai no inap long pinisim NRL sisen wantaim ol Cowboys tasol em bai redi gen long pilai bilong Australia long ol bikipela gem long pinis bi-long dispela yia.

Long dispela tonamen bai lukim Australia Nu Silan, Inglen na Papua Niugini salens long Oktoba 23 i go inap long Novemba 13.

Kosa Neil Henry i tok lek bilong Thurston i solap nau na em bai no inap pilai moa long 6-pela wik.

“Mi toktok wantaim em na em i orait, em i wari olsem em i no pinisim gem bilong em las wik,” Henry i tok.



ORAIT: Thurston bai nap long pilai long 4 Nations salens.

Ragbi lig i ken kisim moa pikinini go long skul

RAGBI lig inap long mekim planti moa yangpela mangi gat laik long go long skul na stap inap skul i pinis.

Na dispela em wanpela astingting tu bilong PNG NRL Bid tim husat ol i kirapim pinis program bilong ol skul long pilai ragbi lig.

Long stat bilong dispela mun ol i kamapim namba wan bung long Nesenel Kapitel Distrik (NCD) bilong skulim ol tisa na ofisol long dispela program.

55 tisa wantaim ol spots masta na ol tisa bilong spots i kamap long dispela bung.

Ol i bung wantaim NRL Bid jenerel menesa, Beverly Broughton, Michelle Monsour, NCD Gavana, Powes Parkop,

Nesenel Dairekta bilong Nu Silan Ragbi Lig, Denis Ward, papa bilong PNG junia skul ragbi lig, Iffysoe Segeyaro na Siaman bilong ol Nesenel Selekta Arnold Krewanty.

Gavana Parkop i tok astingting bilong dispela skul program em long redim ol yangpela pilaia nau bilong bihain taim.

Dispela em wanpela samt-ing we i mas kamap tu, we NRL i askim bipo PNG i ken winim laisens bilong putim wanpela tim insait long NRL.

Ol bai putim dispela program i go insait long edukesen sistem bilong PNG bai em i kamap olsem hap bilong skul bilong ol sumatin tu.

“Mi laikim bai olgeta tisa tu i mas kisim luksave na rejistaim ol yet tu olsem ol ragbi lig refri na kosa,” Gavana Parkop i tok.

Dennis Ward husat i bin wanpela Australian Kangaroo na Clive Churchill medol wina long bipo i sapotim toktok bilong Parkop.

Em i tok em bai gutpela long ol tisa tu i givim han long dispela program long kain wok olsem kosa na refri.

Ward i tok ol bai no inap baim wanpela fi long rejistaim ol yet long mekim dispela wok.

“Ol biknem ragbi lig pilaia bilong yumi long bihain taim i stap autsait long hap na ol lain bilong kisim ol i kam em yu-

pela bilong wanem yupela bai ronim wanpela bikpela na nambawan program tru we ol dispela mangi bai lukluk long yupela long en olgeta taim,” em i tok.

Dispela program bai mekim planti ol mangi tu i gat laik long go long skul na pinisim skul bilong wanem olgeta pilai bai kamap insait long ol skul tasol.

Dispela ol husat i no inap long pilai i ken amamas tasol long sapotim ol wan skul bilong ol long ol arapela wok.

Ol bai lainim planti samt-ing tu olsem pasin bilong wokbung wantaim ol arapela olsem ol i save mekim insait long tim taim ol i stap insait long pilai graun.

Pasin bilong harim tok na bihainim lo tu bai strong long ol we ol bai lainim long ol refri na kosa taim ol i kisim trening na taim ol i pilai.

Husat ol i pilai gut bai gat sans long makim PNG long ol intanesenel pilai na em bai kirapim bel bilong ol long skul na pilai moa yet.

Ol tisa tu bai kisim ol nupela save na eksperiens we i ken helpim ol tu.

Ol i ken kamap ol kosa, refri o mekim ol arapela spots wok olsem ofisol.

PNG NRL Bid i tok dispela program em bilong olgeta manmeri bilong PNG na em bai gutpela long lukim gutpela sapot i kam long komyuniti.

WNB gavman luksave long spots

WES Nu Briten (WNB) gavman bai helpim ol spots grup na asosiesen bilong ol husat i gat tingting long ronim gut ol kompetisen na pilai bilong ol.

Edministreta bilong provins, Steven Raphael, i tokaut long dispela las wik taim em i opim Niugini Ailans soka FA kap fainols long Kimbe.

“Gavman i laik givim sapot long ol kain spots insait long provins,” em i tok.

“Dispela gavman i gat gutpela tingting nau long lukim olsem ol yut bilong yumi noken stap nating na kamapim hevi long komyuniti,” Mista Raphael i tok.

Em i tok amamas long presiden bilong Kimbe Soccer Association (KSA), Kurt Remmein, husat i givim bikpela taim bilong em long ronim dispela asosiesen na tu ol long ol tim husat i kam pilai long dispela tonamen.



LUKSAVE: Ol ofisol i bungim ol pilaia bipo long gem i stat.

Nambawan Olimpik bilong ol yangpela

■ Ikam long pes 28

John Rivan bai makim (etletiks) bai ron long 200 mita resis, anda 15 meri bai pilai soka, Nakmai bai swim bilong PNG long 50m na 100m bres strok (swim) long weiltifting em Kari long 69kg divisen bilong ol man na Samuel stap long 53kg divisen bilong ol meri.

Kari bai karim fleg bilong kantri tu long dispela tonamen.

Long dispela YOG bai ol i mekim sampela wok na bung long sait bilong kalsa na edukesen we i wanpela astingting bilong dispela tonamen.

Em bai skulim na helpim ol yangpela long luksave long kalsa na pasin bilong ol arapela kantri.

Shannon Andrew bai go pas long ol dispela wok na program.

Dispela tu bai namba wan taim bilong em long mekim wok olsem wanpela spots edministreta bilong nesenel tim.

Sapot bilong Fan Ran

TRUKAI Fan Ran em i wanpela rot we Papua New Guinea Sports Federation and Olympic Committee (PNGSFOC) save bungim mani bilong salim ol PNG tim i go pilai ovasis long ol bikpela tonamen.

Plantil ol bikpela kampani na ogenaiesen i save givim han long helpim dispela wok.

Wanpela bilong ol em SP Brewery husat i wokbung wantaim PNGSFOC long planti kain wok olsem.

Dispela yia ol i givim han gen long baim 1, 000 Fan Ran siot we ol i givim i go long tupela skul insait long Nesenel Kapitel Distrik (NCD).

Las wik ol i givim dispela ol siot i go long Port Moresby Technical School na Don Bosco Technical School i kisim dispela ol siot long SP Brewery.

Dispela ol skul i ken salim ol siot long ol sumatin bilong ol na mani bai go bek long helpim ol wok bilong skul.

Ol arapela sponsa i save mekim wankain.

“Mipela i luksave olsem mani kamap long Fan Ran i save helpim PNG Spots Federesen na Olimpik Komiti long salim PNG tim i go pilai ovasis,” mausman bilong SP Brewery, Mista Atahu i tok.

“Mipela i save givim planti helpim tu long ol arapela spots olsem ragbi lig, SP spots awod na South Pacific Export PNG Open golp,” em i tok.

Trukai Fan Ran long dispela yia bai kamap long Sande Ogas, 22 long 1ong 13 ples insait long kantri.

SP i lukluk tu long sapotim ol skul long Lae, Goroka na Kokopo.

SPOT RAUN

WANTAIM

Scott Vavine, ML



Wok bilong ronim kompetisen

LAS wik mi toktok long ol rot bilong ogenaism o stretim ol tim bilong kompetisen o spots resis bilong yu.

Dispela wik bai mi toktok long sampela ol samting yu ken bihainim long ronim gut ol kompetisen bilong yu.

Wok bilong ronim olgeta kain kompetisen bai kamap gut sapos yu stretim o ogenaism yu yet tu.

I gat planti tim na pilaia bai kamap long dispela bung olsem na yu mas putim olgeta samting gut bai yu nap long lukluk na wok gut long ol wanwan.

Bipo long yu statim wok tu, yu mas i gat wampela man husat i gat gutpela save long mekim kain wok, i stap long helpim yu.

Em i mas wampela man o meri husat i gat gutpela save na eksperiens na tu pasin bilong wok olsem lida, dispela kain man bai helpim yu gut.

Wampela wok bilong em bai long pulim ol tim i kam insait long dispela resis.

Long mekim dispela em i mas salim tok i go aut long ol tim husat i laik pilai long kamap na rejistaim nem bilong ol.

Dispela bai helpim em tu long mekim dro bilong ol tim long dispela resis.

Long wankain taim bai em i ken luksave long hamas refri na ofisol na ol arapela samting bilong pilai we em i mas gat long gem long dispela taim.

Wok bilong bungim ol samting bilong pilai na ples bilong pilai em narapela bikipela wok we i mas kamap gut long ronim ol pilai.

Yu mas stretim na makim gut pilai graun bihainim ol mak bilong en stret na putim tu ol gol pos na arapela samting we i mas stap long dispela spot.

I mas i gat ol ofisol long sidaun na lukluk long gem tu, dispela em i bikipela samting olsem ol arapela wok.

I mas i gat liklik haus o karamap bilong pasim san na ren long ol ofisol taim ol i lukautim gem i stap.

Sapos ol i stap gut bai ol i amamas long lukautim gem na ol samting bai ron gut tasol.

Dispela ol lain i gat bikipela wok olsem na yu mas lukautim ol gut tu.

Ol refri tu i mas gat ples bilong ol yet long stap na ronim gem, wok bilong ol tu i bikipela tru.

Dispela ol lain i gat save long ronim wanwan samting insait long gem bilong yu.

Sapos ol i nogat bai resis bilong yu i stop o i bagarap long namel.

Yu mas kamapim wampela rekot we i soim taim bilong wanwan refri long lukautim ol gem.

Dispela mas i go wantaim gro bilong gem we i soim pilai long namba wan de i go inap long laspela de bilong kompetisen.

Em i mas karamapim ol pilai nating na fainols wantaim.

Dispela bai givim sans long ol tim long save long wanem ol tim ol bai bungim long wanwan raun bilong pilai.

Taim gem i wok long kamap, yu mas kamapim points leda na soim long ol tim olgeta taim bai ol i ken save long wanem hap ol i sanap insait long dispela resis.

Points leda i mas kamap olgeta de bihain long pilai long namba wan de i go inap long laspela de bilong pilai.

Ol lo bilong gem bilong yu tu i mas tok klia long wanem kain samting bai kamap long kisim ol tim i go insait long fainols resis.

Bipo long yu statim gem, yu mas raitim olgeta samting i go daun pastaim na wok bihainim.

Yu mas givim dispela pepa bilong gem i go tu long ol ofisol na tim insait long kompetisen.

Dispela bai givim planti helpim tu long sait bilong ronim kompetisen bilong yu gut.

Yu mas tingting tu long givim luksave long ol lain husat i pilai gut long resis dispela yia.

Dispela bai mekim ol i amamas na tu i givim ol strong long pilai gut moa long ol yia i kam.

Pilai bilong ol insait long dispela kompetisen i ken opim rot bilong ol long spots olsem na em i gutpela long givim ol kain luksave.

Yu mas tingim long putim dispela olgeta samting mi tok long en hia insait long baset bilong gem bilong yu we yu mas kamapim tu bipo long gem.

Tingim, sapos yu nogat mani bai yu no inap go longwe tru wantaim dispela pilai.

Mi laik yu kisim dispela hap pepa, ridim na putim i stap ba yu ken lukim olgeta taim na bihainim taim yu laik kamapim wampela kain wok olsem mi tok long hia.

Em inap helpim yu gut tru.



LUS: Gay em namba wan man long winim Bolt bihain long tupela yia.

Namba wan lus bilong Bolt

USAIN Bolt i lusim namba wan resis bilong long 100m las wik long Tyson Gay bilong Amerika.

Gay i putim 9.84 sekens long winim Bolt husat i putim 9.97 sekens long pinis namba tu ples.

Richard Thomson bilong Trinidad i kam namba tri ples wantaim 10.10 sekens.

Dispela i kamap long Diamond League resis bilong ol las wik long Stockholm.

Bolt, husat i holim wol rekot long dispela resis (9.15 sekens) i no lusim wampela resis inap nau.

“Mi amamas tru long winim Usain tasol mi save olsem em i no orait tumas,” Gay i tok bihain long resis.

“Mi laik winim em taim em i orait stret na mipela i resis,” em i tok.

Long Mande dispela wik dokta bilong Bolt i painim olsem Bolt i gat

liklik bagarap long baksait bilong em.

Sapos ol i no stretim dispela bagarap hariap bai em i ken givim hevi long ol lek masol bilong em tu.

Bolt, 23 krismas, i bin gat hevi long narapela lek masol bilong em tasol ol wok painim aut long dispela soim olsem em i rait pinis.

Dispela hevi bai lukim Bolt i no inap resis gen dispela yia.

Bihain long dispela resis long Stockholm las wik Fraide, em i sapos long go resis gen long Zurich na Brussels.

“Mi no amamas bilong wanem mi bai no inap stap insait long tupela bikipela resis dispela yia tasol mi save olsem em i gutpela long mi malolo dispela yia inap mi orait gut gen pastaim,” Bolt i tok.

Gay i tok, Bolt em i nambawan

spit man yet bilong ron na em i laik resis wantaim em taim em i orait stret.

“Usain i save long strong bilong em yet, tingting bilong em dispela yia em long win tasol olsem na mi save em i gat planti spit i stap yet,” em i tok.

Laspela taim Bolt i lus em long 2008 we wamples bilong em bilong Jamaica, Isafa Powell i winim em.

Bihain long dispela em i winim 14 resis we wampela bilong ol em long 2009 Wol sempionsip we em i bin winim Gay.

“Sampela taim yu gat gutpela de na sampela taim yu get taim nogut.

“Mi traim hat nau nait tasol mi no bin inap,” Bolt i tok.

“Tyson i bin redi gut moa long mi na i kam olsem na em i win,” em i tok.

NUPELA komiti bai strongim bek ragbi lig

Andrew Molen i raitim

NUPELA komiti bilong PNG Rugby Football League (PNGRFL) bai strongim gen bilip bilong ol manmeri long nambawan gem bilong ol.

John Numapo bai go pas long komiti olsem siaman.

Gary Juffa na Albert Veratau husat tupela i bin go long kot long lukim husat tru em presiden bilong PNGRFL, nau bai stap olsem komiti memba tasol aninit long Numapo.

Bipo siaman, Veratau i rausim dispela namel long em na Juffa long kot

na lus tingting long en.

Hevi bilong tupela i bin kamap bihain long Juffa na ol memba bilong em i no wanbel long makim bilong Veratau olsem siaman long enuel jenerel bung bilong PNGRFL long Lae long 2009.

Juffa na Veratau nau i wanbel long lustingting long hevi bilong tupela na wokbung gen long gutpela bilong ragbi lig insait long PNG.

Jastis Kandakasi i givim luksave long dispela pasin stretim tok namel long ol long Julai 29, dispela yia.

Dispela nupela bai kisim ples bi-

long komiti we Rugby League International Federation (RLIF) i bin makim long lukautim PNGRFL taim hevi bilong ol i bin stap long kot.

Ol bai makim ol arapela liklik komiti long lukautim na ronim wanwan ol arapela wok bilong PNGRFL.

Aninit long dispela tok orait kot i makim tu wanwan wok bilong komiti na ol dispela memba bilong em we ol i mas wokim bipo long 2010 bung bilong PNGRFL.

Wok bilong dispela komiti bai pinis bihain long dispela bikipela bung bilong PNGRFL.

LAE
BISCUIT CO.

WANTOK

SPOTS

LAE
BISCUIT CO.

Isu 1878

Wan wik: Fonde, Ogas 12 - 18, 2010.

1st

wantok
rate

BEST VALUE CALL RATES

	8am-7pm Day		7pm-8am Night	
Call Rates from bemobile to bemobile	1st minute	after 1 minute	1st minute	after 1 minute
	79t	1t	49t	1t

bemobile

taktok moa

Nambawan Olimpik
bilong ol yangpela

NAMBA WAN Papua Niugini tim bilong Youth Olympic Games (YOG) long Singapore i lusim kantri long Fonde moning, dispela wik.

YOG bai stat long Ogas 14 na pinis long Ogas 26.

Insait long tim dispela tim i go aste em wetlifta, Ranuinu Samuel, swima Ian Nakmai na yangpela

pesman o embeseda bilong PNG long dispela gem, Shannon Andrew.

Soka tim bilong ol meri go pinis long Kuala Lumpar long Malaysia long pilai sampela gem bipo ol i go long YOG.

Narapela weiltifta, Steven Kari tu bai joinim tim long hap.

Em i stap nau long Nu Kaledonia

long trening aninit long skolasip bilong Osenia weiltifting Federesen.

Bosmeri bilong tim, Auvita Rapilla i lusim kantri na go pas long Sande.

I gat 22 pilaia na 12-pela ofisol insait long dispela tim.

Ol bai makim PNG long etletiks, soka, swimming na weiltifting.

■ Igo moa long pes 26

YUNIFOM: PNG YOG tim i soim bilas ol bai werim long Singapore.

Johnston's Pharmacies

For First Aid Kits. Red& Body Bulk Protein Supplements. Thompson Vitamins, Bandages, Strapping Tape, Mouth Guards.

All Sport and First Aid requirements.

P.O.Box 1066 Boroko.

Phone 325 3185. Fax 325 0190.

Email sales@johnstons.com.pg."

Publisher of the newspaper operates at Section 58, Allotment 3, Office 2, Waigani Drive